



屏溪先生集卷二十八

墓表

共三十

~ 16
2419
28



和
2419
30-28

屏溪先生集卷之五十五目錄

墓表

孝子安公 載墓表

進士安君 世煥墓表

監察李公 徽墓表

尹君 台鼎墓表

南塘俞公 權墓表

忠義衛金公 弘弼墓表

俞公 權墓表

進士南君 道弘墓表

樂善齋

副護軍 贈禮曹判書西浦郭公 說 墓表

孤青徐先生墓表

參軍金公 始鳴 墓表

領議政金公 興慶 墓表

學生韓公 泰震 墓表

寢郎蘇君 貞震 墓表

白泉金君 智賢 墓表

道巖處士卞君 益夏 墓表

先妣 贈貞夫人李氏墓表

生員洪君 啓宇 墓表

副正魯公 鴻 墓表

白君胤喬墓表

光國功臣校理 贈領議政龍陽君果齋尹公

暹 墓表

李君 景生 墓表

進士宋君 鉉器 墓表

學生洪君 鑰 墓表

進士姜君 行遇 墓表

倡義使 贈右參贊朴公 春茂 墓表

僉樞俞公 迪基 墓表

同樞成公 碩衡 墓表

僉樞李公 維新 墓表

尹君 萬東 墓表

先祖文肅公墓表

僉樞姜公 後聖 墓表

屏溪先生集卷之五十五
墓表

孝子安公 載墓表丁未

鳳九出八伽倻二十年餘鄉士友往往說安孝子諱載字仲厚故事尋又卜築於伽倻之玉屏溪上得遊於孝子之諸胤間而讀其所謂家傳益知其前所未聞者頗詳嗚呼公志篤而行備宜不可以一節稱焉聖朝旌之曰孝子某之門古語曰論人必先觀世德公之至行實有所自來矣有諱敏學世稱楓崖先生從遊於栗牛兩先生之際以文學德行爲世名儒公



其曾孫也誰謂醴泉之無源也公生而端良溫雅不與羣兒戲嬉甫六歲常侍于祖母側不肯出遊長者試問之曰祖母老病不可無人乎側公先君子病病閱歲公時九歲晝不解帶夜不就寢無少懈藥飲必躬執治母夫人憫而止之公曰病親之需豈可委之僮僕母夫人撫背歎曰安氏之門其有孝子乎及病益篤每夜靜沐浴露禱號泣願代割指灌血乃得回甦廿餘日竟遭大故公實十二歲也哭泣號擗哀動傍人弔者莫不掩涕童土尹公舜舉而其弟宣舉暨副提學沈攸諸公皆稱賞公於公先君挽誄宗伯金

公佐明委來要見公公終不見實嫌金公之爲禮官也金公益奇之白之上旌其門後公移宅藏其楔不復設也蓋公事親之節靡有不極而公則恆有不足於心者故不安於其孝字也及長事母夫人一以事先君者事之禮節尤備言行無小大必諮稟不敢自專昧爽而省終日侍側定而乃退至於衾褥舒疊必親之家甚貧竭心力具甘毳不令母夫人知其勞也朝夕所進必先嘗而進之所進若有減則憂形于色母夫人憫公之憂或更進其餘在親側雖婢僕未嘗高聲詬罵有事出入事雖未竣歸必趁期親年既

衰則雖家幹有不得已者未嘗出經宿地及喪哀毀踰節三年不怠遇喪餘齋居素服不接賓客祭用皆親檢徹夜號哭無異袒括時公接人和平樂易而見不義則惡之人之有失面規切切而退則不復言知舊親屬主於敦厚而若在權要則雖至親不肯往復平生心不役產業口不及財利手不接錢貨雖文房具未嘗有私蓄焉公廣州人高麗大將軍諱邦傑爲鼻祖而九代祖諱省官三宰錄清白吏其後簪裾蟬聯諱瑱諱好亮寔公祖與考也妣完山李氏其考堅玉也觀察使忠綽之孫也公以 崇禎後乙未生焉

出後於伯父諱好逸娶完山李氏奉直郎樞之女性端貞和順事尊姑一如公孝敬親黨皆稱其君子之速後公二十年而卒壽六十一君葬洪州津頭里坐亥之原孺人權窳德山之石村生四男三女世光世衡世美世德世光世德進士世衡長女早夭姜鳳陽李思述其婿也內外諸孫皆幼嗚呼公自以早孤不得從事於性理之學每自慨悼聞三洲金公講道於石室江上委往見之請教諸子庶伸平日願學之志以公志之篤行之勇若早蒙父兄之提警又能周旋於師友則其所以成就之者必不能涯量矣然事父

母能竭其力子夏以爲雖曰未學吾必謂之學矣所謂性理之學不過爲仁而孝悌乃爲仁之本則公之自幼從事者無非此學其必謂之學者非謂公耶公爲親屈頗肆力於公車業旣不利 朝廷嘉公行誼再擬寢郎又不做畢竟壽不得中身四十三而沒古人謂雖或不能於人而猶得以能於天者亦不可謂的論嗚呼悲夫辭曰
人孰無父母兮愛父母蓋亦天性惟其愛父母兮又孰不知孝子之爲可敬此安孝子仲厚之幽宅兮母或傷其塋域

進士安君世煥墓表

嗚呼此有明朝鮮進士安君世煥字道明墓卽洪州盤山負子之原也君潔淨雅素孝友由天未必從事於學問而行合於道蓋遠而十代祖參贊省以清白著稱近而高祖諱敏學號楓崖先生以學業行誼顯重當世父輅生一歲母夫人殉節虜變以此含痛自廢後因改葬廬墓追喪是雖禮經不許君子謂加於人一等者君之性行真有所自來矣曾祖璟祖好誼俱不仕妣具氏父時俊綾昌尉澣之玄孫君生於壬寅卒於戊戌壽五十七配李氏柄之女 成宗大王

六代孫也二男國光國彥國光二男一女國彥一男
皆幼君八歲讀小學應對執事已能稱長者意父母
有疾輒涕泣號天曰速瘳我父母病及長母夫人嘗
疾劇每夜禱請以身代侍右不施褻服惰容家甚貧
必具甘旨嘗以五不孝之戒自誡曰若犯此則是忘
父母也人而忘父母即禽獸也戊寅己卯連遭外內
艱叫號如不欲生三年如一日喪餘雖祈寒必沐浴
齊潔以致五思哀痛如袒括時邱木必手植壟草必
親鋤出入必告祠事伯氏如事父事巨細皆諮決得
一味輒先餉之伯氏及兩弟俱選癘君晝夜扶將或

勸之避終不聽君則無恙聞者莫不嗟嘆以叔襲事
稱之析產薄於己特厚於季弟若妹曰父母在時婚
嫁未畢父母之所係念此志余恨也處兄弟無物我
間歲歉則自賣己財而共之至令妯娌相親愛如同
氣閨門雍雍無間言於宗族務盡敦睦孤而不能婚
則資裝而婚之貧而不能葬則斂棺而葬之窮而無
所歸則率而蓄之此皆人所難也嘗戒二子曰孝友
即我家傳法汝輩謹守勿替吾死無恨己巳粟牛兩
先生黜文廟君慨然有袒胷受箭之志詣 闕抗疏
及 聖母出西宮宋先生受後 命則乃歎曰 國

無母矣士失宗矣遂廢舉遯迹甲戌變化爲伯氏勸復就舉辛卯中司馬君貌不揚外不如衷不淡知者見之或不以爲重而其行之身者旣潔淨無可疵又於是非義利之際辨之極嚴截是以宗族鄉里如有非義者惟恐君之或知其實行之見重如此辭曰己巳遯甲戌舉一上舍非謂君之榮世汚汚世隆隆是吾與

監察李公微墓表丁卯

光海昏亂諸姦壬承主旨倡廢母議宗戚外臣類靡然附麗雖自好者亦透迤其間冒死直截者幾希

李公諱微以末蔭投狀不仕歸卧先隴若將終身焉死生立判而不懾不懼豈所謂仁勇人者非耶仁廟反正不拘常格以前任繕工監監役卽超六品秩除內資寺主簿轉殿中尋遭外艱服闋再入殿中又遭內艱制除公曰應舉強仕爲親在也今誰爲耶仍迹不復近京口靜居潛玩書史者幾年以崇禎癸酉十二月二十九日卒年四十八嗚呼公嘗少年試中格以額窄漏人朝夕期大闡公以名家子有文有才又有雋望而早遇清明高第顯祿何啻拾芥年未衰遲而俱不屑焉其於名利蓋泊如也公字某世

宗別子廣平大君諱璵六世孫廣平生永順君溥勳業文章照耀國乘祖諱洁官縣監始自致也考諱廷春妣礪山宋氏司評礪女配平壤趙氏其考懾大司憲仁得之孫有令德夫黨稱梱範壽七十一庚子八月十八日沒與公同葬忠州無悔洞向午之原異室也男時齡持平時積有經學名時馥時秘時馥時釐縣監黃爾徵趙瑣李碩秘其婿也內外孫男女四十六人曾玄以下摠二百餘人多不盡錄此公斂德不昭之報也歟辭曰

春秋大義數十崇節義其一公乃從容於禍福之際終能自靖而不屈惟是時與具俱可棄之如燮履而心自安彼固難矣此最難欲知公者於此看

尹君

台鼎

墓表

戊辰

嗚呼此公州錦江北三十里蓼塘尹氏之舊居也少南谷名篤正辛向原有封四尺者尹君台鼎字士和其藏也向上幾武而位者 贈吏曹參判諱愿其考也尹氏本坡平大姓諱敦以討叛民功封咸安伯子孫因籍焉其別於坡平也世聯簪裾我 朝有判奉常寺事起畝參判邁參議顓其顯也 贈司僕寺正諱又進宣傳官 贈左承旨諱柳 贈大司憲翊商

其高祖若曾祖若祖也義州府尹諱進卿 贈左贊
成知中樞府事諱天賚 贈兵曹判書其大憲公本
生祖若父也 贈貞夫人順興安氏正郎諱至女其
妣也恩津宋氏監役夏績女其配也景淵九淵俱官
營將其二男也爲申洸權待姜柱河妻其三女也景
淵子稷九淵子穗而并男八女五之幼者其內外孫
曾也戊申五月二十七日其卒之日也距始生壬戌
之爲四十八者其得年也參判公少執耳鬢庠論力
斥凶論大爲己巳人所嫉惡竟竄北荒安夫人從沒
于謫君穉弱始不得隨聞變號擗如不欲生以爲終

身至慟參判公病沈痼君親扶將數年如一日無怠
及喪哭不撤水漿不入口未替繼妣李夫人沒君五
年守制毀幾滅事繼祖母許夫人怡怡無迂色許夫
人常曰使未亾人忘死者有是孫也其孝親性也家
廟必晨謁出入必告祭祀以禮罔愆其奉先誠也與
諸弟甚有墳簾樂式好無斃撫孤姪如己出授室營
產俾立門戶其友愛篤也平居和易簡率未嘗有忿
厲之容苛細之行喜然諾好施與知不知有窮無依
者收而衣食之家人雖告乏亦不顧也其處人如此
也仲父參判公慘被辛壬禍君棄公車歸蓼塘爲終

焉計其志操如此也戊申途起公弟右尹宅鼎時以小官罷散閒居君走書勸赴難忠義之言令人激仰其憂國慷慨之意有如此也早遊場屋大小發解輒有聲屢踰而終不成有至行名不薦於朝有才志亦不得少試之其亦君之命之奇也吁可惜也謁文者其景淵也述而表之阡者其友坡平尹鳳九也崇禎甲申後百單五年戊辰之七夕其年月日也

南塘俞公

權

墓表

戊辰

春秋不書葬大復讎也蓋賊未討則掩葬爲輕也公伯父宰山陰縣死于姦吏毒獨當室兒衰抱泣呱呱

公時弱冠痛憤冤酷不服衰哭誓心曰復吾讎吾可服吾衰擊午門鼓上囚秋獄立肺石日泣血伸理秋官見公每憫蹙曰矯矯俞某且至囚金多亦莫售竟伏誅黨與盡按法公告伯父靈筵始受衰聞者稱之曰偉哉若人其讀一部春秋者歟公諱權字仲平俞氏籍杞溪始祖新羅阿殮三宰世襲簪裾歷麗至我朝有起昌忤燕山島配中廟改玉以兵曹參議召直歸庇仁楸山終不仕後庇人立祠享之蓋以有伯夷之風云是生禮曹判書諡景安公汝霖判書生府使諱縝無子取弟戶曹判書諡肅敏諱絳子諱涵

子之進士 贈贊成於公為曾祖祖諱大儻僉正
贈承旨考諱勗曾虜難後無意進取不復渡漢妣光
山金氏其父澤吏曹參議號龍溪止男之孫公幼聰
穎有文才童子時就教官學試禮部輒冠曹偶早失
怙事母夫人極誠勤家甚貧衣弊緼飯蔬食意晏如
也然而志養備至甘旨無闕及送終棺木衣衾以美
矣親在歲必稱觴上壽公蒼顏白髮彩舞以娛親與
兩弟湛樂至老不衰酒戶飲數斗未嘗亂醉益斂膝
亦可見操履之篤公娶全州李氏士人益華女曾祖
掌令弘仁孝舅姑順夫子夫黨子姓男女咸愛戴無

間言所後子命集公弟禫之子有志節為公肖子儁
基會基奐基命集出奐基三子彥鑿彥鑿彥鑿長季
為伯仲後女適崔肅觀公側出有三男三女男命燦
命燁命熠公没于 崇禎再己丑三月七日壽七十
八李孺人生先公一年五十一而没葬同穴在扶餘
縣西咸陽村北坐甲原從先兆也公以名家子氣槩
卓犖奇偉持守堅確弘正以其復伯父讎者揆之使
公得位當世其慷慨於天下之恥激仰於君父之讎
者同一志槩而必欲明春秋之義矣終蓬藜行以没
其世吁可惜己辭曰

宇宙百年識春秋復離之義者其幾歟嗚呼此南塘
俞公之墓今後之知公者其必過此而噓唏歟

忠義衛金公弘弼墓表戊辰

傳曰人樂有賢父兄而况兼有賢子弟耶余讀金公
諱弘弼家傳公考諱裕常痛其考有節行卓立未蒙
褒典終其世隱德廢居亦令四子不赴舉云如此者
非賢者歟公有子鎬鑰皆有至行公病割指吮腫嘗
冀及公喪居廬啜粥三年鄉里以賢孝稱公受教於
是父以是教是子公之賢蓋可知矣公性樂易處事
精詳事親親歡悅之接人人嚴畏之平生於名利芬

華泊如也教季方學終成就之伯季夫婦俱沒收三
遺穉撫育之如己出公亦所謂士之賢者歟公字湯
卿金氏順天大姓新羅王之裔平陽君諱摠寔鼻祖
也屢代以顯爵聞麗朝有承靈事我 太宗大王錄
佐命功臣左議政平陽府院君 諡襄景襄景生承
旨有讓承旨生寺正 贈參判嗣源參判生郡守允
濯於公為高祖也曾祖諱自漢祖諱彥國兩世俱力
行有隱德妣平昌李氏吏曹判書翼平公季男曾孫
士人諱鑄之女公娶宜寧南氏同知珏女公以 孝
廟元年庚寅三月二十二日卒壽五十九南孺人後

公十四年没享年七十一葬于廣州竹里乾坐之原
同窆也孺人事君子以禮教子弟以義及同知公喪
奔赴百里程過哀戚以滅其孝所生如此公舉四男
銓銑其叔季俱天錫男碩珪碩輔碩炯碩賓女宋相
哲成雲翼進士以孝 贈佐郎李尚馥統制使 贈
判書鑰出後公弟衡弼男碩禧碩祚碩祉女李震根
銓一女李復慶庶子碩哲內外曾玄多不能記嗚呼
此公生卒世系子孫之略也以公家傳之斷爛者觀
之知公至行懿德可言者多而後人無傳可惜也已
然觀鳳一羽全彩可知又何多乎哉辭曰

父子祖孫四世懿行得於人難吾願何病毋以此倦
後承其儼惟天有常豈亦無報百歲于積終必興止
噫登此壟者看此銘辭寔爾諸祖之志

俞公墓表 己巳

余嘗書公伯氏墓石伯氏器魁偉志卓犖為士友重
於公猶難為兄公其知己公脩幹豐體聲如撞鐘
容儀簡重嚴恪望之若難犯即之溫然語纒纒聽之
不厭其辨是非論義理必僂僂嚴繩尺知舊有大過
必言之不改則絕其改者待之如初無過也人既憚
之又愛慕之久不衰公與市南先生同曾祖出自童

子時學於市南市南以遠大期三歲失怙不識父面嘗曰余天地間一罪人平生不服華美後改葬公年已七十食素終三月常善病一素食輒疾加三月能無恙人謂誠孝之感事母夫人孝兄弟力田恭職侍右色愉婉以樂病則藥餌必躬執夜露立禱天及喪葬祭一如禮母夫人慟其慈氏葬在淺土臨歿謂公曰吾死目難瞑公泣受命買山以克葬公見人赤尸未收脫衣而斂之貧族過時未婚助需而成之親友子友亾無所歸收而教育之皆人所難能俞氏貫杞溪公世大族不待遠譜五代祖景安公諱汝霖子肅

敏公諱絳俱官判書肅敏子進士諱涵出後兄府使諱纘祖諱大侁僉正考諱勛曾虜亂後去漢師遁居扶餘不復渡漢母夫人光山金氏渾之女祖監司止男配安東權氏父有衡參判至其曾祖孺人喪父獨子初有令聞及歸公奉尊姑誠事夫子禮視婢奴如同氣夫黨咸稱焉悶母氏無依倚忠養于家至歿遷父墓數百里合封命小子祭之其孝所生亦至矣公生於 崇禎辛巳七十七歲而歿孺人後公一歲生歿先公二十三年公葬在扶餘縣西道東峯負壬原先兆也孺人同窆男命集命燮命楫長繼伯氏生雋

屏溪集卷之五十一
基會基奐基命變命楫俱無子命變取子會基會基
又無子以奐基子彥鋈爲子命楫繼子重基重基子
彥鋈嗚呼公之雋才偉志終沒草莽公其不自嗟惋
耶人貴自得彼滄滄於聲利富貴者不得則固愁鬱
歎吃如公之考槃在阿翠竹碧梧琴酒以娛意已自
得雖失之彼又何怨也惟是公之始學既見賞於市
翁而早邁奇疾竟不得究其志而大其學公於此亦
安得不爲之自惜也噫銘曰
嗟叔氏暨伯兮伊志才俱傑鬼不少施惜無命我銘
誌詔後永

進士南君

道弘

墓表

己巳

鸕洲之水出自黃岳至月留峯下沿洄而爲冷泉寔
尤菴宋先生遺址也水上下五十里谷窈溪清多名
區黃溪之號佳山水以此壬子夏余入黃岳登考盤
臺至活溪南君道弘士能麻衣竹杖携酒來候相與
披雲石坐談山論水余已知士能之爲山水主人也
歸至三槐亭下溪山靚穆亦名區之一也士能曰噫
此名壽山我八代祖諱義文判書諱琴之子早卒妣
判書仲夏女徐氏自漢北卜居于茲至曾孫諱知言
學於己卯賢人嵐亭金公始昌其婦父也以小學自

律孝悌 聞于朝官察訪號三槐堂三槐卽此樹公
手所植也公考諱寅參奉子諱景孝直長俱以孝薦
世稱南氏三世孝三槐後五六世子孫數十家居不
出此山外粗能勉修孝謹無墜詩禮遺業余於是益
知士能世德儒雅直長公後 贈參判參判子諱守
柔孫諱山瑀皆以大耄受 恩資是士能曾祖與祖
也考諱鈇妣安東權氏以正女君性至孝母病在胃
食輒嘔君呼泣必從而嘔之時纔五歲後因母病思
食有叩冰得魚之異每值 國諱必齋服北向危坐
不御酒肉南氏之孝固不止三世而其向 國之誠

亦孝之移也歟君嘗從遊於丈巖鄭公濬陶菴李公
緯講業焉又引後生秀才獎誘程督以經學爲本湖
嶺間稱黃溪之蔚然興學皆君力也君居宋先生遺
化之鄉儻亦聞先生之風者耶君生於 崇禎後癸
亥沒甲子僅一匝葬縣西十里西松院癸向原先兆
也配密陽朴氏孝基之女繼配寶城吳氏其考昌基
男尚德女適鄭萬恆又一男幼吳氏出君晚中司馬
試題其墓曰進士南公之墓余追記君爲余言者略
書石陰如此系以辭曰

余徃徃之黃溪兮聞於黃溪黃溪之士視壽山如魯

之徂徠兮視士能又如徂徠之石徂徠余固知壽山
為黃溪之望兮士能又為壽山之望也哉

副護軍

贈禮曹判書西浦郭公

說

墓表

辛未

木川治之瓮洞負良原有墳高四尺者西原郭公諱
說字夢得號西浦衣履藏也公沒之百二十二年五
代孫鎮經謀豎石以表阡於戲其不忘也非公之賢
其何能愈久而愈不忍忘公生於 嘉靖戊申歿於
崇禎庚午四十二闡大科初隸國子周流戶兵工刑
郎或兼記注奉常則自僉正至正 宗廟則令而外
之成歡察訪尼城縣監醴泉加平郡守其踐歷也居

官以恪勤廉詳存心愛濟稱八十由四品例陞通政
己巳又陞從二品資 特賜米帛脯酒皆優老恩也

後以子希泰原從勞

贈禮曹判書始祖諱詳新羅

侍中麗末有寶文閣大提學

諡文良公樞不受我

朝官爵曾祖諱敬儀縣監祖諱完生員

贈執義考

諱懷英寺正

贈都承旨妣靈山辛氏察訪貴貞女

公幼聰悟四歲識數十字五歲綴文六歲與兄弟爭
論終南形勝即口呼詩曰不識終南真面目只緣身
在此山中見者奇之十歲通四書十二誦詩書讀離
騷經六遍能誦恨不及承旨公三遍而誦也十六魁

輪次連居漢城試第一名其詩皆膾炙人口終屈南省公不以爲意早志爲己業就成聽松學又就正於牛溪先生而與沙溪先生友契淡摯及沒招諸子孫諄諄教誡遂頽面洗手足着新衣易舊簣命子孫退出俄然而化卽八月二十四日也公性孝親喪啜粥終制葬祭以禮平居言無疾色不遽終日危坐無懈惰容述作典雅類古文趨勒神妙如松雪柳西垞根金南窓玄成每稱公詩與筆晚好易踰大耋猶夜讀不輟所著有詩文若干杏錄耳目所見聞名西浦日錄藏于家娶南陽洪氏其父僉知翼聖大司憲興玄

孫後公二年生沒後公二十二年葬同兆男長卽希泰文科同知 贈判書次希震郡守 贈承旨女適進士金鉉孫執義之欽都正昌徵大徵相徵弘徵師傳始徵希泰一子五孫也監察有欽文徵成徵重欽壽徵希震二子三孫也昌徵子世績進士萬績獻納熙績監役萬績子郡守鎮基熙績子正郎鎮緯始徵孫鎮維成徵孫鎮雲俱生員鎮經來謁文卽鎮緯弟也內外孫裔多不盡錄公家世文華而且有奇才雅操通籍文苑宜進塗大闢公常陶然好靜坐厭世之論論者流以此仕宦在進退間公又何尤噫辭曰

世之夸而趨兮我則貞而退官不華其何傷兮顧余美之在內惟觀師友之盛兮庶幾知公之賢此其達尊者藏兮傳百世其勿穿

孤青徐先生墓表

壬申

語云醴泉無源靈芝無種天之生賢人君子豈皆有世類先生不以所出之微而質粹而少駁志大而不苟自幼少謂聖賢可學無理不窮無踐不實已見大意汎濫羣書亦極有通弱冠徒步尋師莽蒼地無寒暑不廢一日又入智異溪處煮梨充飢講學不掇先生之篤學蓋如此其論勿忘勿助之義以春翁所說

者觀之先生心法之密可知也其以好善嫉惡之語反其意而答重峯者觀之先生自治之嚴可知也斥責重峯疏論時事者先生之重自任也及聞重峯自讀其疏整冠再拜者先生之尊大義也朝夕瞻依朱子真幘自謂於朱夫子如七十子之服孔子此先生入道之正也如土亭則師之南溟東洲龜峯重峯沙溪則從遊之西溪李公得胤清坐宋公爾昌白蓮閣公在汶諸公學於先生而宋頤菴朴思菴二大人亦皆以詩簡相稱與此先生師友之盛也於此數者可知爲先生也先生真豪傑之才誠篤之學求之曠世

難得其匹惟東俗迫隘尚名分而不尚德是以先生
生而名不薦於朝澤不及於民沒而俎豆之享亦不
得與列於羣賢士林莫不慨然沈歎先生之沒百六
十年 當寧庚午因道臣狀聞 命贈司憲府持平
聖上褒崇遺逸不以貴賤有間豈非先生實德欽服
於後而然耶先生姓徐諱起字待可號孤青卒於
萬曆辛卯壽六十九考龜齡其先無譜可考奉先生
祀者玄孫遇徵來謁文者五代孫德遠也銘曰
孤青峯之東負西原有封三尺此孤青徐先生之墓
惟百代而必式

參軍金公

始鳴

墓表

癸酉

夫仁全一心之德孝出於仁是爲百行之源雖舜武
周公之聖子思必以孝稱焉况在匹夫之賤乎近故
漢城府參軍金公諱始鳴字聲甫性孝也生八歲哭
恃死葬號擗人不忍視事父色容愉婉誠愛懇惻順
志意養無方常若不逮也父八耄寢疾久凡調將之
道竭誠靡措晝食宵眠幾至全廢者歷屢歲如一日
以至割指進血而竟遭終天之痛則哀號隕絕皇皇
不欲生不啜水漿淚盡血繼禮益殺而哀益苦雖終
三年至老衰語及往事不成聲涕汪汪也每喪餘必

敬必慎必親莅鼎俎真誠昭格若將復覩公其有聞於終身慕者歟及孤露友悌益勤兄弟姊妹相恤如傷季弟生事剝落遠寓楸鄉延至同室與共飢飽亦人所難焉公恬靜清修含章自守持心行己自有規模無意拘束而動止云爲自然能近道常主寬和而見人不正惡之若浼已避勢利如仇怨雖姻婭朋友其顯要則不與交遊至如隔鄰貴人慕公操履爲來見之願與相從遂以疾辭不復往報見子弟專主科學則必勸以聖人之學爲先蓋出伊川謂有主客之意也丙申除慶基殿參奉翌年移章陵陞司

甕奉事卒官參軍公以爲官無小大各有其職隨分勤謹無敢或豫其在廚院出莅海箭米穀魚鮮舊多羨餘公無小自私箭屬吏民莫不懷惠今上時在潛邸提舉本院亦加稱獎辛丑冬疾示德十二月十四日卒壽甲子一周壬寅三月葬于衿川山西向之原先兆也金氏新羅宗姓其先有直諫者謫鼓鹽城卽今延安府也因以爲籍諱暹漢始著譜書仕高麗官博士彰明儒教世襲軒冕多大官有濤文譜進又登元朝科授縣丞還本國官密直提學自號蘿菴山人子自知入我朝官開城畱後謚文靖以學

行文章見重寔公十世祖也高祖諱應河甌山縣監曾祖諱榮緒敦寧奉事祖諱守白軍資判官考諱重元文行名世卒不第妣許氏諱堊之女大司成號草堂擘之曾孫公配恭人李氏世宗王子桂陽君之後禁府都事榮先之孫父震錫事舅孝奉君子敬享蘋藻恪謹教子女義方待宗族御僕眾各得其宜居公喪踰制食不滋哭不絕纜經一暮癸卯二月四日竟不勝喪享年六十六祔葬公墓左男長塗出爲伯氏後妙年篤學有成就望早天次燧武舉歷內外將三女爲縣監沈碩贊張震炯張亨紹妻燧所後子載

淳塗亦取族子載寅爲後長婿二女次婿繼子季婿四女皆幼繼子志升嗚呼有子以爲孝悌其爲仁之本歟爲仁卽行仁也仁實天賦之性而行之由孝則莫大者孝公旣庶幾無憾於孝真可謂不負天之所畀也豈不奇焉至於李恭人之貞烈各盡其分者亦可見易通端平之義矣其無觀感而然哉銘曰此金孝子之藏而李貞婦同厝昭乎一邱綱常惟千百禮永護

領議政金公

興慶

墓表

夫立乎人之本朝事是君也敢言者或傷於訐直和

平者易流於容悅若言而不至於訐直和而不近於容悅惟忠厚公正者能之近故領議政金公諱興慶字叔起歷事三朝五十餘年當可言則無不言其言又剴切而無訐直之習詳懇而無容悅之意嗚呼其真忠厚公正而然也公之沒也我聖上以此四字隱卒之正所謂知臣莫如君也蓋當肅廟末年有疾倦勤公初入經筵爲言治病之道不外於養心心正則定而不亂明而不暗至簡能禦煩至靜能制動何患神氣之勞攘榮衛之愆和乎今上癸丑因臺疏激惱不許診藥舉朝惶悶公以新右相進言

曰黨論亦豈無直是非哉無問人色目唯是非是究以理應物人心自然感服何可威制而爲蕩平之道哉又以辭令之煩屢陳戒之曰必有窺殿下淺淡者毋犯啓寵納侮之戒焉公之進言必本於義理者如此肅廟時以少諫發啓請崔錫鼎禮記類編勿講法筵亟毀其板又請治臺臣投合時好戮辱士林者罪翌年肅廟罪儒生之疏斥尹拯者玉堂洪禹瑞等上劄爭之竝命削黜公在政院屢請反汗終至坐罷乙卯賊冕之孫致雲曾藉臺職誣啓寒水權先生後因自辨詆辱益毒館學儒生抗章請罪以

上嚴批至於拜廟而空館公時在告亟上短劄爲言致雲前後醜正之罪士氣不可摧折而 聖明惡黨一念先著 淵衷故如此公義理猶看作黨習以至尊賢之志不篤辨物之鑑不明後又有學儒以尊周事上疏忤旨 上輾轉激怒至有儒生父鞫問之命時夜四鼓公聞之蹶然而起仰屋長吁曰 君違至此無一言匡之是負國也遂秉燭治疏極言政刑之失當尋又上章引罪仍曰 聖上涵養之工未至頻復頻失或不無方來之憂略將先事之戒敢付請謹之章其係斯文事無小大公必言之如此數十年

來忠逆賢換是非全混辛丑大臣半伸半未伸 聖誣莫辨公議鬱抑公初膺三事之 命首言李頤命則 殿下教斷斷赤心金昌集則 殿下教建儲事光明正大既知如此何靳乎伸理也兩臣以國之忠蓋反爲逆鏡輩構陷闔門夷滅豈非至冤極痛者乎上拒之甚屢言而屢不納至庚申因右相俞公拓基言終許伸理而公實爲之權輿焉李公秉常閱公應洙權禱李台重洪啓裕尹汲韓顯謩尹光天及庚申合啓三司皆愍忠討逆欲伸義理而或補下邑或配絕島或被 庭鞫或至削罷公前後并力爭之輒請

收還先是閔亨洙疏論光佐不設侍藥廳以藉亂賊之罪後因其疏復申之上怒遽震荐棘絕塞公言此非亨洙一人言乙巳後合啓之語公議可見今又何罪請還之亨洙復以金遠材事見欺於時相未暴而沒其兄昌洙疏辨之多觸忤上怒甚鞫之闕庭公又言其不可曰殿下前年鞫殺仁敬王后之姪今又杖殺仁顯王后之姪本事得失不暇言周禮八議之法豈無可恕之道上愾然改容金福澤之鞫死也公在鄉以未及匡救爲恨至是竝言之至於明彥之獄公獨持嚴鞫之議謂不可酌處此公

於忠逆之辨尤致謹嚴者而最是壬寅春右尹時身在鄉廬職非言責痛兇黨之禍國忘一身之利害慨然抗章極論時事以爲時議之敗義傷道者不可勝言而嚮者宦婢之變苟有人心孰不驚憂危厲黃一夏之疏只是爲東宮眷眷之忠而勒加削黜至於請竄閔鎮遠則以陳戒其君謂之訐揚引君當道謂之恐喝以休戚忠愛之惻罹時輩誣捏之讒又言鄭亨益之疏斥廷臣語多直截而羣起請竄魚有龍等三諫旣命放釋而乃反請鞫言官取媚時相誠宜痛斥此類俾不得枉害無辜時羣信磨牙衆

蠹伺影一言脫口無不糜碎公疏不啻觸犯而疏竟無批還下公終無恙於劫火中抑幸不幸者存而公之可言而無不言者此可見也陶菴李公絳嘗言君有失金公諫書未嘗不至世以爲知言公系出新羅至麗朝太師諱仁瑄始著姓慶州至公十八代代有簪裾有諱自粹號桑村官都觀察麗亾立懂曾祖諱弘郁文學才識爲世標望孝廟朝以黃海監司應旨言姜獄冤邁禍以兩宋先生言卒賜仲復祖察訪贈贊成諱世珍考生員贈領議政諱斗星妣贈貞敬夫人光州金氏參奉榮後女公以

肅廟丁巳正月十三日生幼聰穎絕倫五六歲誦小學通諺書祖母李夫人時使公讀諺記或呼書諺札俱敏速如流每稱公奇哉十二丁議政公喪持服如成人力學不怠未成童了幾卷經史數百行書讀三四遍輒誦久不忘己卯中司馬不數旬又大闡其冬薦入翰苑兼說書壬午遷典籍癸未登瀛選庚寅擢承旨丙申超開城畱守即移同義禁乙巳陞戶曹判書丙午擢判金吾是年又陞崇祿庚戌陞輔國皆都監勞也壬子拜議政府右議政乙卯陞上相三司銓郎春坊政院皆所踐歷玉堂則至於東壁銀臺則當

品知申而周流參議參判左右尹間 除大司成判
決事徧長六曹京兆以至三四宰判敦寧而都副提
舉者并二十餘司外 除北評事未赴內遷鴻山安
城泰安沔川皆爲養陳乞觀察忠清京畿黃海三道
而湖西再授初則辭不赴海西自家宰特補丙戌廉
察湖西乙巳以大行人赴燕馬公在 肅廟時秩未
崇高以親老在鄉不能專意職事使公將母上來如
是者再 聖上再下夢見之教至曰至誠所感必發
夢寐皆異數也今 春宮誕生公與諸大臣請依馬
皇后例 內殿取以爲子即定 元子名號 上從

之吏判時公屢疏力辭以爲 聖上方懋蕩平之治
豈不盛哉但是非之原不明忠逆之分莫辨政注之
間專事混淆薰蕕冰炭同置一器而謂之蕩平臣旣
不能彌綸而協同寅恭又不可屈意而一從時好則
必將動輒違忤徒取顛敗此臣所以不得進者也
恩批溫旨眷注極摯終不應 命翌年五月竟至
譴遞其出處之不苟所守之堅確有如是者公雖不
免從仕而性本不樂於進取有事入 朝事訖還鄉
難進易退終始如一日及秉句軸 上眷愈隆世臣
分義亦不忍僂訣黽勉在 朝而善類屏野無以進

用兇徒雜處無以退黜獨立 朝端孤子無朋無一
半分可爲之道每自憂歎而激揚之公誅褒之嚴積
在中心終不可掩則屢困於時輩誣悖閃弄而纔陞
上相李錫杓之疏出矣 上知其傾軋至送知申禮
判慰諭之公始出江郊轉歸鄉廬又降 手書敦召
公矢心必遞 上知不可強御筆許副以 王世子
冊封正使辭不獲入城承 命復出郊屢請乞骸
上恩諭促還公自入耆社每申懸車之願己巳冬公
疾示憊三上書請休時 東宮聽政優 批不許
上聞之特賜宸翰曰今卿所陳寔卿病裏苦心心喜

則病愈茲降一張傳旨以代良劑公承 諭扶坐感
泣良久庚午春病益砭以三月二十六日卒于正寢
壽七十四訃聞 上震悼亟遣官致弔祭官庀喪葬
如例 小朝亦遣宮僚弔祭致仕 教書公以病不
能拜 命至是 特令承旨宣讀于靈筵墓在禮山
西烏石山下配貞敬夫人昌原黃氏壽七十三戊辰
先葬西坐原至是同窆焉秋浦文敏公慎芝所忠烈
公一皓參議玠令夏英夫人高曾祖考也夫人莊穆
婉順謹中饋無專輒性樸素居無飾親家貧甚父母
祭需每竭誠備品以送蓋觀於公儉德亦能有感於

公奉先之孝也男長漢楨郡守次漢佐佐郎次漢佑
次漢蓋月城尉尚和順翁主女長適 贈持平李述
之次適府使沈錕泰柱進士恆柱頤柱健柱李元祥
進士洪文漢妻長房出復柱晉柱師柱尹永烈妻二
房出益柱 柱趙國鉉妻三房出後祥衍祥柳敬養
妻李婿出觀之鼎之恆之謙之承旨洪樂性權中一
主簿魚錫定元百孫金斗兼妻沈婿出泰柱長男炳
詰餘皆幼孫曾男女并七十餘人公和純在中英秀
發外渥顏美髯神彩燁然見之莫不以吉祥善士稱
初入堂后北溪李相公世白一見奇之曰風範端重

舉止雍容君可坐老夫席也判書金公鎮龜語人曰
某聰明英達真公輔器先輩定評已如此公內行甚
備孝友篤至早失怙常爲至痛榮養偏慈近四十年
左右歡侍每當 除命以離違膝下爲憂及壬寅內
艱公已向衰三年素食饋奠未嘗替人仲季皆天恤
其所生如己產又以子與孫各嗣其後俾不絕黃氏
姊孤嫠無依奉迎鄰屋不使衣食爲念宗族知舊無
遠邇親踈眷愛周遍雖鄉黨微賤皆悃悞以待至躋
上台不改韋布心居家莅職謹財節用簡慎自律守
先廬僅蔽風雨不增築一弊表三十年無改至若急

困恤置亦無没人情者名官乞養必占腴邑公則自取其薄權柄要地雖彈耐居公則當來必避坦度冲襟自無機關閱歷滄桑獨保舊觀前後 孝 顯兩聖追諡之論輒進會議而皆言光揚 先烈不在數字有無至於癸巳庚申 尊號之議一以謙亨之義仰勉 聖德不從籲請之後此亦公忠厚公正言不至訐直和不近容悅者也槩之公可謂 廊廟上士類也雖不以政事文章自居相業之可道者孰有多於此哉謹以是書之石陰以俟後之來者云

學生韓公

秦震

墓表

余得與公仲季遊餘四十季公亦視余如仲季情甚摯歲辛酉冬葬公於節洞余與二公臨壙握慟今公諸子授余公狀曰先人墓木已拱無表刻仲季二父意圓未成子其責也請書石陰余撫舊傷今其何忍辭公姓韓諱秦震字來卿籍清州始祖諱蘭麗祖太尉文敬公脩號柳巷官大提學文敬子文簡公尚敬事我 太祖官領議政前後連十一代高官崇秩爲屢百年大家世族曾祖諱必迪丁丑構成廢舉自靖自號清節居士祖諱如益官縣監考諱有箕有文行妣咸陽朴氏都正崇阜女參判尹鍊外孫夫黨稱女

唐澤集卷之五十五
士公配宗姓正郎天耆其考也幼事父母有至行及
移孝舅姑誠敬備至男後遠後遂後述伯季俱生員
仲以學行薦聞于朝女適吳載道側出三女適安
麟李大永朴履煥其爲成允欽李厚載朴曾煥具哲
遠妻一男幼長房出聖世爲李昌永妻仲房出宗世
定世爲李邦祿任學周洪相寬妻季房出德應一女
幼吳婿出公卒於辛酉八月十四日距其生丙辰歲
六十六李孺人先公二十六年歿享年四十二戊午
移葬節洞終與公合祔實結城縣西三十里枕乾之
原也嗚呼公淳質長德重厚嚴毅文藝夙成人皆期

以決科早廢舉業幹才適周不得爲世所知終老草
莽知公者皆惜之公嘗謂余曰吾家世貧余爲督自
念二老人供奉非踈節且二弟才優於我成就是急
此吾責也遂自棄科學看當家務仰事俯育二弟不
至憂衣食亂心而周旋師友專意所事仲能見推士
友季亦揚名王朝余固粗遂初志雖老死窮廬無
所憾見世之沒沒榮利者雖同氣間各有自私之意
公捨己所業竟使二弟成其志業其處心之公可知
豈不多乎哉仲公以鎮川磻溪有水石之勝且近師
門欲挈家移居公奉親同往有追遊士友之樂甲午

丁外艱既葬與二弟還歸故居壬子遭大碩人喪前後居憂兄弟同處一廬情文俱盡壬子則年紀已衰奉奠益虔季父鰥居窮乏奉養家中存歿事之以誠子女皆嫁娶俾得所其處家行誼鄉鄰無間焉余時會南塘與二公講討義理無書不到公蒼然在座聽之不倦曰君輩自講說我不妨為濂溪之季初平也其所得之者蓋無異秉燭之工云噫二公意中草本今不可知只以余觀聞於公者書之如此二公如有知其必曰吾意亦如此云否吁可傷也仲南塘公諱元震季參議公諱啓震也歲 崇禎甲申後再丙子

初冬坡平尹鳳九書

寢郎蘇君 貞震墓表

歲丁丑春余浮白江歷黃湖出彌勒山陽即古所謂金馬郡也郡姓蘇氏世居自昔多聞人有西巖公諱貞震亦一鄉之善士云公五世孫上舍顯道以公狀謁余曰此吾先人所錄願得子一言書表陰庶酬先志余按狀蘇氏貫晉州鼻祖希哲麗朝上護軍幾世至都事 贈贊成諱自坡生六丈夫縣監諱世得其季也太學士暘谷世讓之弟縣監生學生諱迺早歿學生生諱擇善官司饗院主簿寔公之考妣咸安李

氏雨之女公字子正少聰悟文藝早成二十七中司
馬遊賢館聲望出曹偶與校理公光震爲遠兄弟並
擅詞章華聞藹蔚公獨屈南省知公者皆寃之親歿
卽謝絕公車用薦除順陵寢郎又不赴其意蓋
誰爲榮誰爲養也更斂華務約就朴實頭用工左圖
右書靜居曠討時與冠童游泳林泉飄飄有出塵之
想焉族弟監司東道每擬以師禮事公王事靡暇終
不得則慨恨之語至發於輓誄公文行爲人所慕效
者如此公歿於甲戌正月十日距其生嘉靖甲子七
十一年葬于益山炭谷負壬之原從先兆公娶全州

崔氏父判官晦葬同塋生一女無嗣取族兄縣監泗
源子啓命爲後女適洪采啓命生山海郡守曰必揚
必傑皆出後女爲李明律妻側室子曰山濬武科山
濟洪婿二女適縣令鄭之益李以養珩璋郡守出璫
瑛武科城金守剛妻必揚出珪琬玖璫李台柱妻必
傑出內外曾玄多不盡錄狀公行者璋之子德三也
嗚呼有支行而無其位可謂得於人耶然有德者必
有壽不可謂不得於天也吁公之隧其以是而可鐫
歟

白泉金君

智賢

墓表

昔獻子過乎喪不肯俯就禮孔子稱加於人一等嗚呼若故白泉金君其亦聞獻子之風者歟君性孝也事父母至誠純篤晨昏必定省志色之養無違峽居家貧嘗鑿池養魚繼日具供久旱池竭耕奴請廢魚種稻語咈孝思君聞之臨池痛泣忽水湧滿池畜魚復盛及母歿以父在不忍一日遠離側不廬母墓常侍筵几而時見乎父朔望治別奠必上墓祭之雖雨雪不廢服除復設母真像朝夕奠饋終三年不與婦人相對不進鹽醬汜醴雖蔬菜味美則不近也其居父幃一如前喪母平日嗜雉祭必薦之當祭忌夏潦

彌日君自痛無以得雉飛雉自來庭除君使人拱之以需焉人皆以此并與池魚而謂誠孝之感友諸弟甚摯父母歿念父母所愛式好尤篤丁卯 康陵大喪君大布服三年前後四 國哀朔望輒設奠望哭曰吾父母生死於太平者非我 后之德耶吾其哭之豈異於父母耶君配亦從君而服 國喪誠禮切至聞者感歎君歿一府民士咸曰此忠孝人也相率籲告方伯上聞之特旌其閭君諱智賢字國平所居有泉名曰白泉鄉人尊君稱白泉高祖諱光佑謫兔山移配成川後官至德川郡守子孫仍居于成而著

屏溪集卷之五十五
姓于兔郡守生通德郎諱士安通德生禦侮諱孟亨
禦侮生諱重寶即君考也妣池氏澄之女君生于嘉
靖甲午歿於萬曆丙辰五月三日享年八十三配安
城李氏其考士人浩男長文卓有文行官訓導次武
卓無後女長適參奉朴大德以壬辰起義功後贈
大司憲次適金應珍好德尚德順德訓導出元淳汝
淳大憲出好德生得剛善剛尚德生有剛以剛今至
六七代摠七十餘人多不能盡錄來謁文者六世孫
榮澤旣舊池修先旌能繼君志事嚮余遊香岳自丫
坡向沸流過所謂白泉者居人指君旌與池語君故

事頗詳噫君爲親爲國誠意懇惻直發於天理之
自然不知所以裁之雖不可謂一一中於禮而其孝
移爲忠純心苦情至謂之加於人一等亦不謂過矣

銘曰

使君從事先致知學以君篤行所就曷極然君之過
君子之過觀於君者知仁庶可吾故特書于石之左

道巖處士卞君益夏墓表

崇禎甲申後再丁酉春正月一日卞君謙叔歿于清
州之飛鴻舊居寒水老先生哭而慟之曰父母命薄
而家運之衰歟斯文不幸而世道之阨歟氣清而不

厚學篤而不就斯人至於斯耶命改其旌曰道巖處
士卞公之柩嗚呼先生之哭之慟者豈非以誰爲者
而且其慟之之辭不止爲私好也君子一言九鼎大
呂今與後之欲知君者觀此其庶幾也歟君諱益夏
謙叔其字卞氏籍八溪上祖高麗太師諱光世襲替
纓 本朝有景福號栢陰年踰五十背負老母遇難
逃竄人以江革之孝稱 命旌其閭卽君五代祖也
曾祖諱時益文承旨祖諱搏參奉考諱東尚有文行
以孝特 贈吏曹參判妣徐氏從 贈貞夫人 贈
判書晉履女達城尉景霄孫副提學松崖金公慶餘

其外祖也君胚胎前光生而端秀性孝其世類也三
歲睡覺急號徐夫人疾往審之手觸傷血君見之色
動不食乳撫其傷而又哭自是恐母氏驚不復哭四
歲出遊人有饋新果者君懷之歸遺父母少嘗而還
與則又分于兄姊父母起居必扶將每夙興束帶拜
候父母祭祀必晨起盥櫛參拜致齋諸節一遵長者
爲之此皆幼穉時已然後值仲氏父子伯氏長子并
喪於癘疫伯氏將躬蒞喪事君泣謂曰伯氏父母所
重不宜自輕請吾任之親自斂殯情文無缺君則不
染誠意之感亦庾袞故事也卞氏家世清寒君有婦

財頗饒性不喜治產業出財獻于參判公別立庫儲以備竊盛與兄弟姊妹同財需用若伯氏則自裘葛之奉以至出入賓客之具必先己而供辦推及於親戚知友之窮不能嫁娶者隨宜助成皆人所難也踰弱冠從伯氏受業於江門先生愛其天資近道且其制行誠篤每稱謙叔真是吾必謂之學矣者也君家後有一大巖名道巖先生爲書道巖閒居四大字以與之其有意也命改旌道巖處士者以此也丙申冬參判公疾篤彌久君衣不解晝夜侍湯寢門外晨必就園後屏處泣禱于天請以身代夢有神童告以藥

在故篋覺而異之覓之參判公日用舊器得童夢煎進之公病即差始通言語語諸子曰夢一神官持紅衣將加我益夏請而代着此何兆耶是兒將大吾門而何其夢之不吉也君即病而一如公疾不言不省仍以歿焉噫其悲夫以其年三月某日葬于清州紙川負丁之原配光山金氏府使珏之孫通德郎一秦女一女適進士李思彬金氏取君從弟昌夏之子至中爲嗣男李奎元婿金履常洪景仁二女幼李出嗚呼古語曰不知其人視其友君既見賞於先生而華菴李頤根可久巍巖李柬公舉南塘韓元震德昭鳳

巖蔡之洪君範皆君從遊講學之人而諸賢之愛慕推與相期者重君之得於師友者如此君之所以為君者其在斯歟至中將樹石以識墓為來屏溪謂坡平尹鳳九知先人者而子在矣非無文也惟子之托余感念舊誼不得以拙蕪辭書其大略俾刻于石陰即君歿後四十三年己卯春也

先妣 贈貞夫人李氏墓表

先妣 贈貞夫人李氏 恭靖大王別子守道正諱德生七代孫考 贈大司憲諱慶昌妣 贈貞夫人全義李氏其考諱擇善先妣以 崇禎甲申後丙申

十二月十三日生及歸我先府君時我王考參判府君尚在堂先妣逮主饋養王考使小孫女致語曰新婦善養我先妣性溫仁端良事尊章孝勤接親黨和厚處妯娌慈順二前妣有三丈夫子伯年過舞象仲叔亦已就傅時自櫛頰服食至娶婦心誠鞠育真不中不遠後有所生男女而人之視之不知其異同也府君平日與季氏直長公伯姪都事君同居一室異姓多聚一以遜慎際接不存相猶之私絕無方圓之歎而若我季母金夫人則夾居最久布帛米鹽無小大朝夕共之而不惟一毫得失之念初無幾微見情

廣澤集卷之五十五
歡意洽雖天倫同氣亦所罕見此先君子弟兄友恭
之化及於刑家而非二母氏嘉柔之德自相孚吉亦
何能至此府君不以家幹綴意外則伯氏替督內則
先妣自管僕婢多二前妣給使庭無間言又能服均
視字恤之恩飢且寒不怨常無甌石資多眷日用殆
無麵之托而府君宦遊服膳精鮮無缺其爲府君盡
瘁之婦者三十九年間從府君謫海墘又隨爲縣之
嶺邑與共苦樂者亦七八年在縣內政清約月入之
外無一毫需索織纁線針之際皆恩義流通愛戴如
平生主僕及還途道涕泣若失慈抱是助府君仁簡

之政爲多哭府君後十九年歿卽丙辰二月二十九
日壽八十一嗚呼慟哉不肖兄弟連赴郡縣遞奉板
輿先妣自以未亾餘喘獨餉榮養常悒悒不樂每曰
居官宜儉約如貧家制產若以吾之故犯手官財非
所以養吾也其自飭與誠告不肖等類如此初葬德
山於隱洞丁巳十月移窆于泰安北伊作負壬之原
後六年辛酉遷府君墓葬同塋二前妣合祔一窆先
妣別封墳在後鳳九懼歲久不知爲先妣墳也茲綴
數行文使鳳五長孫頤厚書之小石以表識之府君
諱明運官廣興倉守以子鳳五陞秩中大夫 贈府

屏溪集卷之五十五
君吏曹參判先妣從 贈焉府君世系及不肖兄弟
與子姪具載大碣此不著時 崇禎甲申後再己卯
月日也

生員洪君啓字墓表

朱子嘗論知行而以行為重又以為雖有忠信之行
知不明不免為小人此其嚴淑隱之辨則反以知為
重洪君大叔當邪正一變為忠途卓然自拔於眾咻
之中與太學諸章甫同聲討逆其見義之明如白辨
黑邁往之操如水赴壑豈所謂知勇人者非耶君諱
啓字大叔其字也唐城人其先唐末學士來居銀樹

浦名其邑曰唐城今南陽府幾代諱殷悅麗朝太師
即譜書初祖也屢公屢卿 我朝有友菊齋諱敬孫
守同知成均石壁諱春卿吏曹參議自此源遠派別
為數百年世族大家至觀察使諱命元號海峯寔君
高祖僉正 贈參判諱處溪縣監諱受泰曾祖與祖
考諱禹龜才行為士類推譽命述不遇妣李氏 穆
陵別子慶昌君珩曾孫清平君淦女君以 肅廟甲
戌四月二十三日生纔三歲而孤又一年縣監公歿
李孺人悶君清羸不令就外傳而教之義方伯氏文
學已早成君樂得同氣間師友學日就將十四伯氏

又天物君痛身世孤子且念門戶單替菽水餘力黽
勉公車業少有庠舍名三十三始中司馬試翌年丁
憂君以前喪幼不能自盡為至痛至是斂棺葬祭必
誠必慎不以貧無以為力一循禮節癸丑四月五日
以疾卒于龍山寓舍葬揚州花蝶洞負坎之原從先
兆也初娶竹山安氏父相英參判續之孫繼娶河東
鄭氏其父洵男若海如海安氏出章海鄭氏出若海
為伯氏後又無子取族子相宅為後如海一男二女
女長適閔曾烈嗚呼君聰明溫雅英華曠發自幼嗜
好在墨戲淡得鍾王心畫寂於篆籀盡三昧法其或

染紙則必精神逼古得隻字人皆為寶君嘗謂古篆
散出鍾鼎各異其體人無知者自蒼頡鳥迹以至孔
壁科斗諸書無不博究而會通之遂依梅氏字彙彙
分而合成六冊名曰古文字彙平居一室蕭然意趣
清絕暇日排案古文三五十種玩而自樂外至欣懽
泊如也惟是身滯城闔而托意山林迹混科臼而非
心進取不曾專精經學而義理微奧見解透淡多有
人所不及未嘗馳逐時論而斯文是非涇渭甚晰終
能立脚嚴正所可惜者以君清高之才敏妙之識若
早從事於聖賢之學究竟乎朱子法門其成就豈有

既也章海從余遊久嘉其實學今以所著家狀一通
謁余表之墓知其記實之言無媿余筆茲撮若干語
俾書于石陰云時 崇禎甲申後再已卯南至日坡
平尹鳳九述

副正魯公鴻墓表庚辰

春秋之義莫大於尊周亦天理中一事今於君臣之
義能盡性分之所當為則自可合於天理雖不讀一
部春秋而尊周之義固自在矣嗚呼故副正魯公鴻
非所謂其人者耶昔我 神宗皇帝萬曆四十六年
戊午建虜大寇 帝下詔徵兵 本國金將軍應河

以宣川郡守領左營兵將赴時公棄官居天冠山下
曾為金將軍所知至是檄召之公與同鄉壯士卞德
駟即日辦行裝將發有一子尚幼攀衣啼號公抱而
置之曰汝其好長也慷慨語家人曰大丈夫今有此
塞外之行幸得死所萬里遼薊裹革是分兒女輩無
作別離狀妻孥莫敢仰視立飲酒三大碗遂上馬不
顧而行比至從金將軍隸副元帥己未二月二十一
日渡江入遼及淡河之戰公與德駟左右金將軍力
戰不離次所射殺甚眾俄而矢盡劒亦折將軍曰公
等皆去公曰豈有獨生之理乎遂與之同死實三月

屏溪集卷之五十五
四日也有一卒伏於亂屍中潛見其始終生還本國
爲語湖南人曰澗河大樹下積屍中長身大面髯半
白者卽魯將軍屍也嗚呼偉哉公之死也華陽宋先
生書金將軍廟碑曰將軍之一死可以明天下之大
義立天下之大經爲春秋尊周攘夷之義也澗河大
樹真公之死所終能與金將軍爲春秋尊周之人則
正所謂盡君臣性分之理不讀春秋書而自合於尊
周之義者也公豈不偉且奇哉公字汝信咸豐人始
祖諱穆麗朝封咸豐君其後有賜紫金魚袋仁厚修
文殿學士貫道累世冠冕我朝有得平以文章名

歷踐翰林舍人公考諱平國官軍資正公以嘉靖
庚申生身長八尺餘體大過圍廣額方頤面如斗髭
髯若神怒則磔磔如戟勇力絕倫韜略諳熟見者皆
以魯將軍稱當壬辰倭寇以武蔭末班選壯士與兵
使黃進水使魏大器等皆力戰斬獲輒居最都元帥
以公習知海路形便啓請鎮南桃浦公卽整理船具
急赴李忠武期會適潮退船膠衆不得拽下公遂負
船推之船疾如矢賊船已漲海公且戰且行克赴期
李公見而壯之極稱獎焉後錄原從二等勳叙功增
秩至訓練副正始登庚子武科公性亢直老而益硬

與世寡合公亦無進取意晚爲會寧鎮萬戶則歎曰
折腰向鄉里小兒吾亦恥之遂謝病歸冠山舊居時
或射獵山澤間每以霸陵亭李將軍自况後以遺衣
依矢復禮葬于長興拂營山東坐坎之原淑人魏氏
祔焉淑人父軍資正德弘祖參奉鯤淑人享年九十
餘說當時事歷歷子孫嘗錄以爲家乘云子一變一
變三子時聖禧聖師聖二女爲金克成徐一中妻弼
周弼宗時聖出弼昌弼宣弼武禧聖出弼審師聖出
皆好義氣善騎射不墜公偉丈夫風公之忠義貫金
石儀度出倫類天固有意生者公終守志死事義光

尊周公可謂不負天所生之意也然生而君上不
知其何狀歿而忠節不見其褒錄何天之生之者厚
而報施者薄也抑天下勢而已豈天定亦不能勝人
而然耶傳所謂天地之大而猶有所憾者非耶弼審
子泮一從於溪上一日以公狀示余謁余公墓文余
感慨而書之如此俾刻于石陰時崇禎甲申後再
庚辰清明日坡平尹鳳九書

白君胤耆墓表

庚辰

人之不係世類尚矣近故龜峯孤青諸賢不以所生
之微而學術文章爲世名儒然皆隱居求道講學士

友以成就之未有如白胤者之混於府史奔走於車塵馬迹之間而能有志於學聖人學者也豈不奇且美哉以詩則蒼然有古意文亦雅順主理致足以暴顯當世其不以是名者有大焉於百行之源敬誠篤至終死於哀 筵臣禮曹判書申公晦吏曹參判金公致仁刑曹參議趙公明鼎禮曹參議成公天柱一辭稱其孝以爲白胤者方持生母喪鹽糶之外無所食仕退歸家服衰居苦哭泣之哀感動傍人非但實行卓異古今疑禮最爲精通今補編之役多采其言其不勝喪誠可慘惜 上屢加嗟尚命卽旌其閭又

後 別恩豈不是人倫之至貴然此猶蚩蚩者或能之而棹楔相望則亦不足爲胤者多也胤者取商書學于古之意以學古扁所居室日讀五經四子於其中明格致誠正之方究天人理數之源左右圖書潛玩體認其言心法則必辨天理人欲之分以爲拔本塞源之要道又言爲人不知禮行之率悖於天理孰能歸仁從事九容律身四勿積之既久舉止有常又常自慨然以爲時有淳澆而理無古今服聖人之心行聖人之事三代可復王道可興也學校教養古也後之科舉取人末也廢之則人才可得風俗可純并

田之法行則班祿可定民產可均昭穆之制復則上下宮廬之侈公私祭祀之謬皆可以整頓禁緇徒革奴婢則軍丁裕而精銳不可勝用罷折受去免稅則國用富而軍餉亦自有餘又曰天下有道如堯舜天下無道如湯武人君之道盡矣天下有道如三謨天下無道如三仁人臣之道盡矣達則堯舜君民窮則孔孟言行人之道盡矣蓋其見之高志之大言議之峻正如此事父母竭其力與兄弟極其友家間男女終日歡聚於親側父子妻妹各有位分整肅之中和氣藹然絕嗜欲味淡泊着喫僅止蔽充親戚之嫁娶

過時者爲之經紀窮而無歸者收而恤之死而無主者斂而葬之祀先尤致誠敬當祭前期齋沐雖僮僕在門內者皆令致齋父母亾日號哭如袒括時祭後終日有憂色朔望必焚香拜祠出入經宿皆拜告三月一上墓輒哭盡哀癘疫時奴僕傳痛家人請出送則曰奴主義猶父子病且不可以風使子奉母出避親自救治竟無他故書戒諸子主忠孝懋德行禁絕巫卜左道以至婚喪俗弊最嚴於辭受有以非義遺數百緡錢者厲聲斥退飭家人閉戶不納此胤耆事行之大略其可書者何止此若胤耆者不但閭巷中

所無雖求之士大夫之儒門法家豈易得哉時上命諸臣編輯喪禮諸公辟胤耆掌文書胤耆舉三件大禮請諸公白于上釐改之一卽上昭穆之制也其二喪禮被髮之謬嗣王冕服之疑也其言曰今天下衣冠文物掃地有王者起必來取法於我東益亦勉之昔朱子乞修三禮而時君不聽退老欲正廟制而朝議歧異王朝之禮尚此茅紙今聖上有編輯之命甚盛舉也當此機會若不能復三代之禮一洒千載之陋則豈不爲終古之恨諸公重其事而不能用胤耆又以補編中節目可疑者數十餘條稟議諸

公多見采用 筵臣所陳白者此也胤耆姓白系出南海之平山縣高麗侍中景臣之後間爲閩巷人世有階銜父啓功郎俊元母折衝李根逸女生父喜昌以原從勳 贈判決事生母觀象監主簿金愛明女也胤耆死於戊寅四月八日年四十九葬楊州牛耳里壬坐之原卽世葬之地娶副護軍李亨運女生六男敬門謙門顯門餘皆夭二女朴昌臣全景祿妻胤耆嘗爲曹吏或疑而問之曰家貧親老無以爲養曹仕吾分也此有常俸卽古人祿養之義何害道理且能操心公平隨事自效則其於報國豈有貴賤之殊

屏溪集 卷之五十五
哉嗚呼凡世之有一藝者必出入於權勢之門以售拔身之計胤者初無在下援上之意惟思所在盡分之道其亦聞素位行之義者歟此胤者之高處也所以世之不知胤者也惜哉一日有人手狀拱立于庭見其玉雪可念問之即謙門爲謁其父表陰之記也賜之坐語之謙門已經祥面有餘憾聞其言儘有所存觀於草木可知其山之美遂撮其狀書之如右俾刻于石云時 崇禎甲申再庚辰中元屏溪翁書

光國功臣校理 贈領議政龍陽君果齋尹公

暹墓表

有明萬曆二十年壬辰朝鮮光國功臣校理 贈領議政果齋尹公諱暹字汝進赴尚州之役死之尤菴宋先生銘神道之碑坡平尹鳳九撮其略書之表陰曰嗚呼君臣大倫天之經地之義而所謂民之彝者非晦翁夫子之言乎之經之義撐天地互萬古何有何無惟在人也在存之則存亡之則亡倫彝之存亡而國家以之存亡焉若果齋尹公其存得此倫彝扶天經地義國賴而存者也偉哉偉哉當倭奴舉國來寇敢言上犯 天朝志士仁人莫不駭憤公以前校理爲大將李鎰辟從軍至尚州之甌淵遇賊軍鬪鎰逃

屏溪集卷之五十五
走謂公曰徒死無益公曰男兒爲國死職耳遂死於陣其平日之所惡有甚於死者由是不肯同鎰而避也七年倭寇忠義之士死王事者何限然公之死爲首其終使君臣大倫不墜於地而國賴而不亾者謂公之倡之亦可也噫公之忠義以孝父母友兄弟爲本而又博學明識義理之辨如燭照物取舍之判如刀兩斷惟從是處當爲優爲在臺閣則不畏權貴見不義輒劾在經幄則自附格非惟君德是匡粟牛兩賢爲羣宵讒誣則正言辨明不憚廢棄亦皆公忠義之施也時有 宗系之誣爲國家大恥辱公以小行

人至禮部乞得實典改本而叩頭流血以示不得則埋骨燕山之意禮部爲之聳動及上聞 天子嘉歎持以改本先頒本 國我 穆廟喜甚曰蕭曹衛霍不足言其功也榮公等光國勳其若不獲 命公必死矣公畢竟死國之意已著於此豈以一時意氣倉卒殺身者比耶思菴朴公栗谷李先生每稱公爲當世之第一流輒膺極選趙重峯疏極論君子小人而以公爲君子人觀人必於其黨諸賢之所以重公者如此則此可以知公也公之孫兩學士節義之卓然亦所謂觀我生者而 孝廟至以一門三節稱之大

聖人華褒又奚啻諸賢之稱重耶公之節既能昭乎日月而公之名自此與泰山重矣吾復何言世系官爵已悉於大碑而今奉公祀者溫陽郡守琰也時崇禎甲申後再庚辰長至日

李君

景生

墓表

壬午

華陽宋文正先生以正學大道爲一世宗師當是時四方之經生學子莫不聞風興起月城李君景生亦自利縣至執贄於華陽受近思錄等書先生手書真實心地刻苦工夫八字以勉焉蓋與之進也君羣行焯焯不可選記而惟孝事父母色愉婉務順志及喪

毀成疾不許進薑桂族祖居數里晨昏必往省期功喪不飲酒食肉終其制所謂加人一等者也常曰禮者人之所大閑一踰此無所不爲利者慾之所由生一放行百惡備至必敬而勿失克治益嚴方可爲學見人善惟恐其或掩而見不善則嫉之如仇讎與人言有犯長上者輒不與之酬酢以此鄉鄰有不義者皆憚君之知之也貧無資一毫不苟取語其子吾死勿以紬緞斂屍吾未曾服此死而有知豈能安其守貧儉約多類此君幼有聰明稍長淹貫經史徬通外書亦不屑爲所願學爲己也晚乃出入於大賢之門

屏溪集卷之五十五
見聞益廣操履益篤其成就不止爲北方大儒而已
當師門變起與同門先進疏辨先生誣己巳之禍迎
哭於南陬君既事親孝於師又能盡一事之義其可
以警衰俗之淪也夫月城之李其始祖諱謁平歷羅
麗幾世至我世宗朝有諱地以雙城君金得禮女
婿坐豪強全家配端川時割端川地新設利縣子孫
仍爲利縣人七世至諱士國是君之祖也考諱應男
妣梁川金氏夢虎之女君字伯行生於萬曆己未卒
於癸未九月十七日壽八十五墓在縣東摩雲嶺下
負亥之原先兆也配朱氏工曹典書仁之後其考鳳

翼也柔順慈和事君子無違後君三年歿享年八十
有九男之榮之華之芳女適金舜赫之華以家學稱
孫曾多不盡錄之華孫德符早從諸大人學又遊李
陶菴李松菴門知名士友間卽來謁文者也銘曰
北學豪傑宋文正語一言之重九鼎大呂持書之石
我筆無恠嗟爾後生過此必式

進士宋君

鉉器

墓表

壬午

清州府治之西墨坊山下有綱常村村向上忠烈公
泉谷宋先生衣履之藏在焉村前棹楔焜煌與日月
爭光卽先生忠臣之旌也村號之書以綱常自古而

然者殆若津備語云君先生五世孫諱鉉器字叔瓚亦綱常村人蓋先生子孫後居於此天錫爾類皆能克其家古語曰論人必本於世德斯言信夫礪山之宋以高麗進士惟翊爲鼻祖又有貞烈公松禮爲麗朝名臣曰禧入我朝判司空至七世諱復興蔭補縣官及大闡丁母憂不勝喪卽泉谷之考也泉谷子諱仁及弱冠入賊陣尋泉谷屍歸以爲讎虜不可共戴必通文譜庶可伸吾志纔登第以正言卽卒聞者悲之諱根監役丙子虜亂奔問圍城聞和成痛哭南歸不復仕戒子孫勿書丙子後官銜諱文烜諱喜吉

皆有才早卒寔君高曾祖禰也妣慶州李氏參奉贈參判慶昌女君孝友天成生纔數月先公棄背君沒身孺慕值夫日必親具籩豆將事于宗家每有不暨之痛事母氏誠愛備至致養無缺及喪哀毀甚喪制一遵文公家禮姊氏早寡無所歸君奉于家撫諸甥如己出事伯氏抱川公如司馬公之伯康誠心愛敬伯氏中司馬君擇私田獻母氏爲誌慶資母氏喜甚其養志者類此漢師有泉谷舊第宗孫貧不自保君不忍其輸別人歸其直新其棟宇還揭泉谷旌板俾復舊觀及伯氏宦遊與之同居己伯氏罷官還鄉

屏溪集卷之五十五
君亦同惠好夜則聯衾晝則同榻常置酒又邀諸從
早晚歡會笑語湛樂出入必詣伯氏問起居輒詢足
否不時而贈之嘗與諸從鳩財取剩爲泉谷以下五
世置祭田豎墓石以其餘又買地各授諸從爲三叔
父祭田泉谷祧主當歸于庶孫君又別立廟以祀而
使庶孫主之每秋會宗族於其下盃酒盡歡親黨多
貧甚量力周濟各有其方其最窶者數三人全家而
育之嘗值大饑君在京第還書戒子曰親黨一有餓
殍余過也宜盡心贖恤以是待以舉火者衆以至鄰
里有喪貧無以爲斂者必出力賻而殯之人或感其

恩以田券歸之則輒斥而不受性好賓客戶屢常滿
饋餼必豐腆疏賤皆得其歡心綜理事務無洪纖處
置得當人有疑難多待君而判焉戊辰伯氏卒哀慟
之甚忽忽無人世意翌年冬行前妣諱祀追念悲絕
仍感疾寢篤君自知不起咸集子姪宗族告之曰吾
年視先子遠過惟願早歸泉下以伸融洩之樂出示
髮膚曰無一毀傷吾庶幾全歸召婦女使之拜訣取
酒合俾幼獻酬以序曰此盃難再爾輩隨量飲之皆
悲泣不能飲曰疾不病何用如此君哂曰死生命耳
吾所以爲此者欲盡平生之歡何乃作慼慼容耶以

屏溪集卷之五十五
先代未遑諸事托同堂弟姪又戒長姪孺曰忠孝友
愛吾家世傳汝等勉之又語子霖曰爲親送終人情
雖無窮已過中非禮也汝識之誠諸孫曰努力文學
毋墜家聲下至奴僕皆有命戒嘗出寓村舍一宿旋
入曰吾可考終於正寢以庚午正月四日卒距其生
甲子六十有七年葬于泉谷墓東麓負良原君配密
陽朴氏判尹崇元之後僉樞新命之女德性孝謹行
誼絕異別有狀此不書後君三年生至是決意下從
實君歿之翌日也與君同日同穴而耐左焉一男即
霖女尹元喆妻霖子尚輝明輝志學長輝李奎景其

婿也曾孫男女數人幼嗚呼事父母孝與兄弟友宗
族感其恩朋友服其義在家在鄉雍穆愷悌數十年
如一日此皆君實行也雖求之於古豈易得也又其
死生之際怡然整暇命酒告訣無一毫怛然意平日
素養之厚庶幾可見而邵先生臨訣善謔底氣象亦
可謂無媿矣君嘗占司馬屢擬寢郎不做竟以成
均進士書其墓石知君者惜之吁

學生洪君鑰墓表

南陽洪生得聖葬其父母於燕岐縣北江洞負亥之
原請記表陰於屏溪尹鳳九曰吾父名鑰字仲剛上

祖高麗太師殷悅父之父曰禹績以學行 贈持平
祖曰廷嵩 朝廷嘉其孝 贈佐郎後因吾從兄得
厚貴持平加 贈吏曹參議佐郎加 贈寺正父之
母曰安東金氏以精之女判書碯之後也吾父以
肅廟戊午生自幼有仁孝稱甫三歲輒隨父後晨謁
先廟侍食於父父未飯不先嘗父曰兒可昌大吾門
十二喪其母能哀慕率禮弔者曰兩世孝子之門又
生是兒母臨歿拊吾父背曰舊衣弊而新裁未縫吾
將逝嗟夫及喪姊勸服新衣吾父曰慈母手中線何
忍去也號泣不絕聲姊恐傷其意而已之少績文以

詞翰見賞於先輩泊然無進取意人或問之笑曰吾
斯未信間以父命赴鄉庠居上游遭其仲季父喪期
年不赴舉蓋有照於程子之言也至辛巳又就鄉闈
忽聞父諱沒身哀痛不復從公車留意問學與其伯
仲比屋而居姊夫尹公廷亮則同爨焉尹公在村寓
邁癘歿無人檢斂吾兄弟且患疹吾父躬視絞衾歸
殯於家內曰俗不可拘也吾兄弟竟無恙人咸異之
其三姊黃氏婦有一女而孀吾父聞其女病革泣曰
姊誰依夜涉險濤而往焉女已死矣斂而葬奉姊致
養于家平生踈財喜施兄弟姊妹通其有無而無私

儲宗黨鄰并有急輒濟之晚年窶甚亦不自恤對人絕無說貧語今 上丁卯吾父年七十寢疾正月三十日命正席而終焉吾母商山金氏其考潑弘文正字號養真堂澤五世孫也後吾父七年而生先吾父二十一年而歿二男長吾得聖次得悅側出二男幼女適宋重彥吾子相協相五相恪吾婿鄭述煥得悅早幼以相恪嗣焉嗚呼余不獲從君遊雖未能識君之槩嘗見縣士林東維二百餘人別君之實聞于道伯曰家傳孝友才兼需世一句語足以見士林之公誦而亦可以知君爲一鄉之望今吾於爾言不間遂

書之如此庶幾無媿吾筆也夫

進士姜君

行遇

墓表

甲申

有志行高潔文學敏達不少試而天齋其年者即余故友姜君子猷也嗚呼子猷今日何處復得子猷弱冠自湖鄉北學漢師漢師之諸士友爭相從遊出入黌舍文詞屈曹偶課製輒居上游屢發解辛丑始中司馬試人朝夕期大闡己士禍作世道大變君慨然有遺世之志謂此豈進取時耶及余携家入伽椰卜築屏溪之上君送余行曰子其去矣吾亦從此逝矣更築室於海美之道谷名其齋曰述先仍號述齋蓋

舊庄也距溪上僅莽蒼餘相從講討之樂將百年爲期未及大歸遽舉復於京口嗚呼惜哉子猷遠祖諱民瞻本晉州人與姜邯贊禦契丹立大功封開國男諡殷烈立祠于晉 本朝有禮儀判書大提學天命觀察使隱少尹諧大司成老監正叔淮至熙臣學行直授六品秩卒官府使歷數世諱義俊以行誼登薦章屢 除教官別提不就寔君高祖曾祖諱謙丁卯胡亂薦授白衣從事官惡自黜辟不起及丁丑下城慷慨激烈凜凜若蹈海也常謂義不忍忘 南朝自號南齋後 贈執義祖諱後望以偉器純行稱考諱

眩有至行 贈持平妣恭人慶州李氏其考慶棊繼妣恭人慶州金氏冲菴先生五世孫澍之女君金氏生也自府使公學術孝烈世以趾美君之志行文學早有譽於士友者豈謂醴泉無源也君諱行遇初諱允升子猷其字也生而氣清心粹聰明絕倫讀禹貢數遍便成誦凡書一過目久不怠自幼少已知好學十四通四子詩書及綱目長又博洽羣書必先用功於經書爲根基之地於史則歷代典故靡不熟複不嫌上蔡玩喪之譏人或有問舉全段如誦己言金監司士重以史學名亦謂君史庫也不可當嘗曰四書

房淨集卷之五十五
之後義理文章無過朱子取大全手自抄寫昕夕念
誦又抄性理大全心經諸書以優省閱東儒最慕尤
菴先生以爲朱子後一人而親近文字不離左右以
寓江漢之思君始以文詞交遊不拘色目而君本內
哲外確凡於是非言議必優優焉及辛壬之際邪正
變爲忠逆則君處之甚嚴曰從今爲彼之論者不可
復以朋儕待之絕不相往來君之最爲一邊人媚嫉
者以此君篤於內行持平公疾革刺指進血及喪哀
毀踰制講究喪祭禮家間舊例或有不盡合於古禮
則必改而如禮事邱嫂如事母數十年如一日家庭

無間言友愛弟妹嫁娶無失時營產必先於己析著
自取其薄早失怙季氏進士君時纔舞象君耳提而
身教之不失旣翁之和而其或誨責之嚴則至使季
君涕泣不敢仰對而終能成就其名季君之事之以
父師者不止爲兄弟間知己而已君配全義李氏父
冲謙祖郡守行運清江公濟臣五世孫端莊貞淑婦
德甚備事夫子必敬慎奉兄姒如尊姑及歿兄姒每
泣而語曰與未亾人同居廿餘年未嘗見一言一事
不相合者今遽失之寔余之命薄也不但孺人德性
之懿此而可徵亦豈非君刑家之美有以致之耶君

享年僅四十四歿於庚戌五月十一日孺人歿先君
一月寶四月二十一日君之葬卜于漢江南岸學堂
村坐壬原先兆也用周人合祔之禮卽其年八月日
也男審言弼言皆進士文行不墜家傳審言出後伯
氏二女長適尹致文次幼弼言子女幼嗚呼君雖以
門戶之計厄於公車而吾東之士有志措世者亦惟
此一路而已則其不斷置寶未忍忘情者有之豈賈
輕肥爲也若使君文識言議蜚英世路宜有風猷之
可觀終焉埋沒而止此儕友所共惜也及值括囊之
時既有遂初之計如非天奪之速以平日篤好朱子

之學必能百原靜坐以究竟之其所成就尤何以涯
量此余所以重爲君惜之也弼言從吾遊久今以其
兄所爲狀者謁余曰吾先君知友惟子在耳後事之
責敢以爲請余愴念疇昔不能以老病辭略書之如
此君沒後三十五年甲申之季夏也

倡義使

贈右參贊朴公

春茂

墓表

宣祖昭敬大王二十五年壬辰島夷僭亂 龍輿播
越于斯時也草野忠烈之士倡義討賊者蓋多而
贈右參贊朴公諱春茂亦其一也公謝官家食聞亂
慷慨灑血登埤得七百餘人選賊於清州與趙重峯

屏溪集卷之五十五
先生合戰敗之又踣之於鎮川終又率衆覲 上於
龍灣 上嘉之拜倡義使嗚呼忠肝義膽公自得之
秉彝而靈芝有根醴泉有源則亦豈無所由而然哉
公八世祖判書仲林號閒碩堂其子醉琴軒彭年世
所稱六臣之首也父子兄弟叔姪同日并命景春軒
引年校檢璉卽醉琴之弟與姪而於公爲六七代祖
也忠烈之氣萃于一門鍾毓及公而公之子東命赴
死南漢孫弘遠樹功鞍峴皆以義旅公之家傳身教
淵源之盛有如此夫公字至元自號花遷校檢之後
世故不振考儒學教授諱箕精有隱德祖訓導諱坤

孫上祖英規佐麗王討神劍封平城君子孫世貫平
陽平陽今爲湖南順天府妣慶州金氏牧使永珍之
女公自幼種學績文請益於土亭先生之門善事親
朝廷聞其賢授官不起間爲養暫就督郵旣憂廬墓
啜粥戚易兩盡常晨謁家廟朔望上墓雖風雨不廢
晚益肆力於墳典翫然以爲樂公眞純誠篤學人也
鎮川之役賊勢鴟張義軍單弱公乞救於列郡皆環
擁不肯出師曰巡察命也公誓衆以死謂其子東命
弟春蕃曰戰陣無勇非孝也士皆殊死戰斬獲賊甚
多賊撤窩宵遁遂以克復時公從子錫命以三道助

屏溪集卷之五十五
防將力戰樹勳豈亦非公平日教導之正耶亂已公
大歸鄉廬連除林川郡守富平府使皆不赴以壽
考終于家公葬在清州南八峯山面子之原即土亭
所卜也公厥有再配扶安林氏進士大春女舉一子
新命宣傳官全義李氏女舉一子一女即東
命郡守女適閔涵新命一子弘胤東命四子長即弘
遠次弘憲弘翼弘衍曾孫以下多不盡錄弘遠曾孫
思欽謁余記公墓石之陰世遠事點只撮先輩文字
之可據者而略言之惟趙先生丙戌疏辨別君子小
人是非之源而謂公恬靜自守與一代諸賢并論之

亂初李公山甫語上曰臣同門友有朴春茂者忠
孝慷慨必爲國效節及公起義上謂李公曰卿可
謂知人也且尤菴先生銘李公時發之碑爲言李公
從事於義將朴某手撰檄文重峯大賢也鳴谷高識
也獎詡而期與之既淡李公之抱負大而不憚自處
於下風尤翁之大筆而亦特書之者意有在焉亦可
以觀公之重也弘衍孫之虛當今上戊申舉義兵
從倡義使敏雄於上黨山城敏雄即春蕃玄孫公之
遺風餘烈克有趾承之美閒碩之世已多死忠之炳
然自公兄弟倡義者又若是之多而前後忠義之輩

出獨於公一派而最盛吁亦奇哉故書此以示于禩
時 崇禎甲申後三乙酉初夏日

僉樞俞公

迪基墓表

杞溪俞氏始祖仕新羅官阿殮名不傳幾世至麗太
祖時有義臣以羅朝世臣不服降屬杞溪戶長自其
數世連大官入本朝諱汝霖禮曹判書景安公諱絳
戶曹判書肅敏公父子接武卿月爲世名臣族遂大
公肅敏公六世孫也公之考孝子 贈義禁府都事
諱命亮生公未晬而卒公自念家世有立揚意且以
早孤恐不能自樹痛自刻責兀兀力學遂病喉母鄭

夫人憂而止之公溫顏順承夜則障戶篝燈低聲呻
唔不使夫人知也既長文藝夙達久不利有司蓋公
操執甚嚴得失之際有絲毫非其義者不屑也人亦
不敢以私浼公以是躔躑辛丑始釋褐登上庠則旋
見時事大非絕意進取入加平華嶽山中漁樵以自
娛庚申從蔭塗拜 永禧殿參奉公姊子徐參判命
臣愍公老勸以捷徑進公歎曰吾已倦矣且僥冒非
吾志也平陞奉事直長由主簿都事出監平澤唐津
二縣晚不樂仕宦杜門屏居蔬糲不給晏如也癸未
用優老 恩拜僉樞七月十日考終于城西舊第距

其生已巳得年七十五葬于木川納恩坪向坤之次
公諱迪基字惠叔肅敏之後有諱希曾郡守 贈參
判諱樞都承旨公會祖與祖也鄭夫人海州名閼承
旨勛其考也二配全州李氏九齡之女驪州李氏萬
謙之女并耐公墓一男彥師二婿宋億休尹瑩皆後
配出公性孝梨栗時常從鄰兒嬉聞喚爺聲歸語母
夫人曰父何在相抱而啼人不忍視事母夫人愛敬
篤至及疾瓿指血以進既憂廬于墓雖風雪不廢朝
晡哭語及考妣輒哀泣不自勝到老不衰公可謂終
身而慕者也余與公自少講世及公之來唐每鳴騶

過從聯枕情話已遽作山中故事念公真率樂易對
人剗去畦畛披露悃悞居官清約自牧仁恕為政言
論主於義絕不類末俗澆忍態常心欽賞之彥師與
余從遊久今謁余表墓陰謹書平日所以知公者俾
鐫于石

同樞成公碩衡墓表

同知中樞府事成公昌寧人諱碩衡平叔字也上祖
侍中松國性孝致異至檜谷大提學文肅公石塔始
著于 本朝子曰達生官判中樞謚襄惠襄惠孫曰
三錫從父兄梅竹堂三問死於忠大禍湛宗隨坐廢

錮間從蔭途世仍不振進士諱協都事 贈寺正諱
彥吉奉事 贈承旨諱時敏即公高曾祖而承旨公
飭躬行義以儒名考 贈參判諱達昌妣 贈貞夫
人咸陽朴氏由經之女公 顯廟甲寅生今 上庚
辰五月朔日卒得年八十七壽資官鴻樞三世覃
恩以此也配貞夫人安東金氏世徽之女有壺懿後
公五年生先公四年歿予以健丁內憂不勝喪孫鎮
坤承重始葬于參判公墓下後移民乙川坐壬原金
氏附左前後皆沔川地也李宗相韓厚琛公之二女
婿鎮厚鎮宅適李宜敏申思贊者鎮坤弟若妹也德

熙績熙復熙二女未行者李出鎮岳適朴致明者韓
出內外曾孫男女若干人余入于海五十年距公居
壤地相接聞公之風素矣今又考其狀公蓋剛毅通
明人也義所當爲勇往不避辨淑慝甚嚴人有疑質
之措置如指諸掌嘗論爲治之方以爲薦用賢良不
專文藝則士風敦矣曉瘠減稅地無不闢則民食足
矣月朔試才賞罰能否則兵力自強皆縝密可法而
終爲草野之空言可惜也已辛亥郡有士論被郡官
誣編配湖南蓋惡公持正議也早孤奉母貧無以養
公喟然曰旣不能立揚顯親宜力穡以供子職課農

桑躬勤儉俾菽水無置育弟鞠姪一視於己祭先必以誠敬營置承旨公墓田作永遠圖教子孫一以孝悌爲本常曰天道以不息生物土之有志者當惜寸陰凡此可以觀公平生矣嗚呼公享其壽而位不顯終無少試真所謂得於天而不得於人者也豈不慨然乎哉今鎮坤來謁表墓之文遂書此俾刻于石

僉樞李公

維新墓表

吾鄉有長厚仁醇壽祿雙全者曰新平李公諱維新字持卿公愛敬篤於家誠謹著于鄉務敦實而剷浮華自修內美不爲隨俗浮沈之行其配洪氏亦性孝

在室喪其考啜粥啗素三年如一日寘平都尉爲夫人內從貴主製一襲衣題其封而送之曰贈洪孝女及歸以事父母者事尊章誠禮備至蓋公與夫人潛德閨懿有如此者天乃錫以遐福公享年八十有一朝廷聞其壽拜僉樞以寵之夫人視公秩初封淑夫人年九十復受貞夫人誥一子進士國馨生四男二女一婿參議俞彥通生四男一女八男三女又各生衆男女內外摠四十餘人公年七十九己未行重牢宴公以黃髮鰥齒被淡衣坐筭輿子若孫肩擁而出衆賓觀者堂上下簇立如林莫不嘖嘖或有感而涕

下者今國馨與其婦尹氏復登八耄拜僉樞是年卽
星會回甲也其子吉儒宰外郡又將飾慶 陛辭入
對 筵臣有以此陳白者 上曰兩世重宰貴矣亟
加歎美焉公既享有景福自能食于身又能遺後人
如此可謂盛矣公之先麗朝平章事德明間有典書
坡 贈判書祥其後以武顯二世官兵使至主簿諱
仁參奉諱彥慶參奉生學生諱恪學生無子取縣監
諱復一子光胄爲後又無子以本生伯氏諱震奎子
子之卽公也縣監公考庶尹諱景恆祖郡守諱文殷
郡守公與主簿公爲再從兄弟寔公所後親所生先

系也夫人貫南陽都事應元女忠正公花浦翼漢孫
丙子斥和臣三學士之一也公生於辛丑卒於辛酉
夫人先公一年生後公十五年沒壽九十有六初葬
墨正里先兆後窆紫芝峯負壬原夫人同窆焉孫哲
儒碩儒今吉州牧使吉儒今鳳山郡守恪儒進士徐
逸修金宗淵妻外孫漢舉進士漢采進士漢伏漢友
許杓妻哲儒男進士道昇道弘道凝女適鄭淳煥姜
德煥崔益碩儒男道健道善女適金履經白東彥吉
儒男道弼道翊女適主簿安允奭恪儒男道燦徐逸
修男有大營將女適安樸金宗淵女適趙燦此外曾

玄男未冠女未行者亦多不盡錄箕疇敘福所先者
壽而所本者德也公乃惟德是好克享大年寬閒康
樂順受其正於是乎五福之全並歸于公而讚歎豔
美之辭已騰人口斯足以示永久而不沒今國馨請
余敘其實用鐫墓石余爲書數行如此以慰孝子無
窮之思也 崇禎甲申後三癸未二月屏溪尹鳳九
述

尹君 萬東 墓表

海平尹宗甫年五十三而歿其考同敦公哭之甚哀
亟爲狀托太史尹公鳳朝紀其事已而同敦公卒尹

公亦未就而逝其兄都正昌東使子翊烈來曰爲吾
弟圖不朽先人志也惟子可以知吾弟子又太史公
從父弟也乞有以文之嗚呼余何忍辭余何忍辭宗
甫諱萬東生於 肅廟甲戌眉顏如畫娟好端秀人
以遠大期之才齒優識字未成童作桃源行曰恨殺
山家春不秘三淵公聞而喜之以孫女妻之宗甫遂
請三淵學嘗以暮三百質之三淵曰毋不識此爲文
未有關也宗甫退而力贖三日始通因論氣盈朔虛
鑿鑿如貫珠三淵大加驚賞宗甫以名家子氣宇踔
厲言論明爽慨然以志節自持若使出爲世需投之

小大宜有可觀而其終不做命耳然宗甫樂淡泊厭浮華不屑於榮利之塗其屢遊公車爲親屈也宗甫尤篤於內行父母有疾夙宵不暫離或命之退在戶外不去候察劇易以爲憂喜兄弟病亦如之弟妹窶一婢病死宗甫卽送女奴後更添以一鬢曰薪水之外有泝泝也辛壬禍作有友生陳疏被謫宗甫脫驂以資之其敦於宗族義於朋友多類此同敦公諱得莘伉高有志節上祖君正顯于麗入本朝彰爲侍從領議政梧陰文靖公諱斗壽領議政文翼公諱昉海嵩尉文穆公諱新之吏曹正郎諱坵監察贈參

議諱世休別檢

贈參判諱夏明宗甫七世以下暨

高曾祖也而監察公以文穆公伯兄判敦寧靖孝公諱履之之孫廣興守諱埴之子爲後於正郎公海平之尹寶東方名閼而至梧陰公德望勳業著龜邦家爲甲乙族妣貞夫人昌寧成氏同樞至行之女牛溪文簡公五世孫也宗甫初娶安東金氏卽三淵公孫女其考郡守養謙有壺懿宗甫狀其行再娶完山李氏其考同樞樞卽余內舅嘗曰吾女有女士行也三娶青松沈氏其考縣監元浚三孺人多舉子女不育男靖烈李出有文行早夭諠烈沈出宗甫葬在積城

屏溪集 卷之五十五
先塋負某之原金李二孺人從葬余與宗甫友三十年每見宗甫汛掃一室左右圖書又置金石錄儵然清坐與村童巷友喜道 國朝興故先輩事蹟纏纏足聽又見宗甫白首困踰激昂慷慨不改其所操即其外可知爲愷悌端方人也嗟乎氣清數局自古而然碌碌者有壽矯矯者不祿至季世而尤甚宗甫其於已定之天何哉可悲也已余蟄影湖海不見宗甫久矣庚申夏自楓嶽還歷過同敦公座與宗甫款洽如平昔未十載而有存沒之感今伯氏又以吾從兄未卒之業勉之是僂同敦公所命也余何忍辭余何

忍辭遂投涕而書之如此云

先祖文肅公墓表

我先祖高麗太保諡文肅公諱瓘字同玄籍坡平功蓋三韓聲施百代宜其衣履之藏表識於後使遺裔薦香過者敬式天道神理之必然而世寢遠爲人侵葬莫省故處吾宗之痛恨傷盡閱幾百年如一日今宗姓東暹東哲在仁駟諸人相與設方便尋得塋域改其封築追遠寓慕始有所矣誠我後孫之莫大慶也嗚呼豈非我先祖赫赫之靈不昧者存有所陰隲而然也歟公高祖諱莘達佐麗太祖統一東土築壁

屏溪集卷之五十五
上功臣官太師爲我尹鼻祖曾祖諱先之亦壁上功
臣祖諱金剛尚書左僕射考諱執衡檢校少府贈
右僕射謚文靖公公早魁科仕華無累遷至吏部尚
書翰林學士承旨肅宗十年參知政事判翰林院事
太學士時女真匪茹北方久矣睿宗初寇擾定州關
勢甚橫乃命公爲都元帥以吳延寵副之授鈇鉞以
送公遂提兵北行入狄鄉遇賊大破之又至金城破
之又至石城賊走入城依險設固軍頓不得進公激
勵將士夾擊大破之不一日而踣兩城又授諸將節
制諸路分攻合擒斬六千餘人諸軍聲生勢長摧鋒

蹂醜若振落焉賊勢死咋逃奔窮北韜弓刀降于陣
前亦相續公自爲露布以賀王賜書褒諭其表云黃
河注壑寸膠不能以防之礮石轉峯虛卵決然其破
矣句語雄勁人至今傳誦拓地七百餘里築九城立
界碑王遙策公爲推忠佐理平戎拓地鎮國功臣拜
門下侍中知軍國重事延寵爲協謀同德功臣凱還
命以鼓吹軍衛迎勞宴郊外未幾女真又來創遣公
征之及獻馘加封鈴平縣開國伯食實封三百戶間
又拜太保上柱國監修國史及卒謚文敬後避綏陵
徽號改今謚公少好學手不釋卷軍中常以五經自

隨後進有才學者喜稱道以是好賢樂善冠於一時
配享睿宗廟我朝亦享崇義殿廡子六人第五男
彥頤登文第官門下平章事政堂文學諡文康我尹
之至今顯於世者皆文康派也公勳庸既著福澤流
遠今內外孫蕃衍貴顯不能盡記而四毓沙麓之慶
誕生聖人綿東邦億萬世基業於休盛哉公墓在
坡平分水院北載之譜牒與輿地勝覽村氓知文肅
公如走卒之誦司馬皆謂文肅公墓在沈家塚岡之
內蓋沈塚下有一古墳後有曲牆之址前有一土墩
亦曰尹侍中轎子塚云吾宗之往來山下者指點傷

惕久矣其後忽有李姓之碑立於墳前是前無而今
有者也益使人疑惑吾宗始與沈氏相詰至達天
聰上教曰七百年古墓若有碑人孰不見而今乃
有之天所立耶鬼所立耶不難知矣又於墳前小礮
中得一碑雖椎剝然勳號爵諡與姓字宛然可讀而
沈氏猶復相難兩家更爲申籲上又教曰故相有
知心焉可僂爲其孫者不使其祖妥靈豈有人理若
不遵此意予當嚴處仍親製文遣近臣致祭於公
墓有曰公墓焉在焚修之北世稱轎塚塋域之側乾
道昭昭皎然此日不覺興愴爰命修飭及其修墓也

沈家猶執迷作挈 聖上赫然臨問廷寂以埋碑及
他墓石移豎之實直供焉乃有廷最不忠不孝之
教其供時諸宗人聽於 仗外傳之甚詳甚矣沈氏
之無狀也沈氏我尹自出也沈氏亦自言而反忍爲
此乎沈墳尚不移地迫墓制終不得備儀豈不傷痛
也哉嗚呼公得朝暮遇於屢百歲之後我 聖上曠
古興感既 命修墓又親爲文以祭公不世之偉績
復著既失之遺藏復露 宸翰輝赫揭如星日後孫
感誦河海莫量惟是文康公墓譜牒亦曰今爲沈政
丞之源山地云而尚不能驗尋此乃誠意之不逮人

事之不盡者也凡我宗姓後人其宜識之也今將先
立表石諸宗人就議于宗中今領府事東度屬鳳九
以載石之文鳳九癯老久廢文墨而後承之效力於
追先事者捨此無以也謹依行狀若本傳掇成爲文
然無他文獻之可徵平日之文章事功不得以揀揚
萬一云爾

僉樞姜公

後聖

墓表

嗚呼洪州府治月高峴直酉之次有四尺而封者曰
始興姜公諱後望字子尚之藏也公右議政文貞公
月塘先生之孫文貞公心愛之甫六歲而 仁廟丙

屏溪集卷之五十五
戊遭家難顛木之葉覆巢之卵腐心泣血七十年如
一日及 肅廟丁酉幽寃畢仲則公已老矣越六年
壬寅以八十二而卒公既生於詩禮之門鍾鼎之家
而自有美質性行純篤器度莊重使公服習庭訓步
武前烈則在家在邦宜其有綽然可觀而公乃壹鬱
幽憂以沒其世晚年一 命壽秩僉樞不足爲公道
也抑天雖既生之亦無奈何於氣數之迫耶自古賢
人君子遭罹禍厄顛覆其家者亦既何限終焉昌大
其後復振厥聲者比比焉是皆消息之理可徵也公
家則文貞公經術文章爲一代宗臣而劫火之餘子

孫窮約敗殘淪落湖海天日重明覆盆回照猶不能
克世其家嗚呼何其舛也公之譜在東淮公所撰文
貞公狀文貞公第二子曰堤川縣監諱文明娶安東
金氏參判光炫女仙源相公之孫辛巳生公有文貞
公命出爲伯父橫城縣監諱文星後尸文貞公祀所
後前妣平山申氏玄軒相公女繼妣綾城具氏主簿
仁壘女也公前配直長光山金宇昌女後配監察水
原李賚女男鳳瑞鳳儀鳳翔鳳陽鳳瑞參奉朴來祥
朴啓源成碩璣金啓錫四女婿三男一女金夫人出
一男三女李夫人出長房生泰興益興鼎興履興仲

房生胤興三房生濟興啓興三女四房生聖興喆興
俊興最興一女長婿朴生三子仲婿朴生四子其長
宗亮文科正言成婿生一子三女金婿生三子一女
其季尚集文科持平內外曾玄孫摠四十餘人多不
錄余未嘗識公與鳳陽爲四十年里社友鳳陽善文
辭侗儻有志氣亦可以想公之風焉 孝宗大王初
潛侍 昭顯瀋館與 東宮諸僚有題名錄堤川公
以桂坊官與焉鳳陽獨能寶此紙於流離之中曾示
余請題數語今又以表陰之記來托余觀狀中語公
平生制行可紀者多余常悲公之世只書其天理之
不可推人事之不可常如此且道互還之機若復其
初則庶幾攬將墜之業收不食之報者在乎嗣人而
又俾百世之後觀此文者尚有以護其壙也嗚呼可
悲也己

屏溪先生集卷之五十五

屏溪先生集卷之五十六目錄

墓表

通德郎李君

光澤

墓表

學生吉君

昌舉

墓表

學生鄭君

鎮河

墓表

處士河君

聖龜

墓表

礪巖金公

宅三

墓表

參奉李公

先穆

墓表

孺人蔡氏表石陰記

大司憲松齋羅公

世續

墓表陰記

俞公 命集 墓望柱石銘

Blank space for the inscription of the tomb stele.

屏溪先生集卷之五十六

墓表

通德郎李君 光澤 墓表

昔栗谷李文成先生講道於海州之石潭以入孝出
悌之行窮理盡性之學嘉惠我後學其遺風餘韻薰
襲濡染今去先生幾十百年海之鄉徃徃有讀書飭
躬之士全城李君亦其一也君生有異質纔識字俊
有學聖賢志及長日晨興冠帶拜廟入書室兀然拱
坐依擊蒙要訣讀書次第循環熟讀不得不措曰讀
書須講明義理體驗身心方覺意味淡長自有進步

屏溪集卷之五十一
處如庸學則沒篇易詩書論孟篇章及濂洛諸書中
意到者靡不口誦心究其他先儒文字之切於爲己
者亦必手書玩味或揭壁觀省蓋其積累既久符驗
外發情慢之容不設于身非僻之言不出於口簡重
溫遜不問可知爲學問士也事其親愛敬篤至於諸
父亦如之大人進士公卜築於松禾吾道峯下畱君
舊第俾治家事君瞻望戀慕得一味必走人先進嘗
之而後食母吳夫人邁癘殆斫指進血屬盡戚易進
士公與諸弟相繼染痛君手執刀圭親自扶護間又
饋奠哀臨君則竟無恙人以庾叔褒方之益致謹於

祭祀稟于進士公與諸弟講商儀節遵備要饌品倣
要訣作永遠圖晚從侍進士公於道峯定省之禮供
奉之誠罔或怠缺及喪毀甚禫而猶不肉友兄弟歡
極墳麓四弟窶甚盡推先業而畀之教子以平日爲
學之序授之常曰未讀只是此等人讀了又是此等
人傻是不曾讀何益之有又曰古人不但曰頭容直
曰心亦要直焉有箕踞而心不慢者哉莫非從樸實
頭地言亦以身教之義也接宗黨以恩御家衆以慈
平生不踐蟻封蓋其仁愛根性也少爲親屈舉鄉貢
不利有司無介介意杜門潛居專致力於常業年五

十四癸丑卒于家君之先曰高麗太師棹傳十世戶部典書丘直官本朝又傳六世北兵使儼其子 贈執義諱敬臣入于海君之高祖也曾祖諱源 贈承旨祖諱碩馨 贈參判進士公諱徽吳夫人貫高敞贈承旨瑞雨其考也配僉樞原州邊尚志女甚有閨懿君伯父同知公每稱曰孝先君一年生後君二十二年卒葬用衛人之祔三男曰仁龜進士曰仁鳳曰仁麟一婿曰崔致隆長房男曰範緝範立範集女適崔永和仲房男曰範洙範濂範洛女適金載寬趙漢源季房男曰範說範畢崔致隆男曰日成女適韓宗

臣李弼晉孫曾男女未名未行者亦多蓋振振焉余未嘗識君從君仲氏與諸子姪遊知君出于先生之鄉聞先生之風慨然興起篤志好學思欲窺見其宗廟之美百官之富不幸中身而歿未充其量可惜也已今君二子來謁圭首之文余不以癡頽辭書其嗟悼之意以告今與後之人曰道峯西麓面酉原三尺之封者誠窩李君諱光澤字潤之之墓云爾

學生吉君

昌舉墓表

湖南之錦山郡有篤行人曰吉君昌舉字纘卿麗朝門下注書治隱先生諱再十世孫先生我東之伯夷

屏溪集卷之五十六
錦又先生之首陽山也子孫世居焉君孝于父母年纔七八日往前溪捕魚以供親雖棗栗之微有得輒懷而進之宗黨長老賀其親曰兒真孝子也及長甚貧竄力田勤蠶身不免飢寒親極溫飽日聞雞適父母之所聞寒燠寒則抱薪躬藝凡所供奉不許人代勞曰此吾職耳鄉里見者或稱其孝輒瞿然曰兄弟多者各盡其力父母之奉猶有餘矣我無兄弟若我不能事父母更何望乎母常患痢久君朝出而薪暮出而漁又走市街求其所思之物或冬月赤體亂冰流斯敲扃膚爲之皴裂猶不知痛父又邁癘而君已

先病幾革猶自力扶護及喪號擗如不欲生時母喪纔再期水飲疏食六年如一日晨夕哭于墓制終朔望拜墓邊笥之實必得平日嗜好以薦之祭之夜不掩扇皇皇若有所待哭泣之哀如袒括初祭已必上墓哭終日不食君可謂生而致其養沒而極其哀者也教諸子恩而有義隨事諄諄其言皆可以爲子弟法平生無疾言遽色詬詈不及於僕夫遇宗戚處鄉黨盡其睦嫻誠懇恂恂醇謹未嘗與人較絜善教誘人閭并爭訟必先質於君君反復譬解俾底于平人各釋然而退嘗值儉歲有丐食者聚黨鬯民大爲里

厚溪集卷之五十六
患君以義理禍福委曲勸戒饋以粥飯丐者退而語其徒曰仁人也慎勿侵撓君後過其近地丐者以雞黍致慇懃其誠信之八人可以無媿於王彥方故事生於肅廟戊辰卒於今上己卯死之日揮婦人出戶正枕設席恬然而逝年七十有二葬于郡東金口水洞考妣墓下曰瑞春曰得南曰士弘曰尚賢君之高曾祖禰妣金海金氏仲甲之女配密陽朴氏其父以卿舉三男慶集慶會慶延宗徹浩徹長房出源徹二房出章徹三房出君宅心寬靜和平制行堅確謹篤可書者多矣惟其純誠至孝是為百行之源忠

孝無二致而先生之事父母孝且至矣今君之孝可謂尚類矣向余大書先生遺墟百世清風碑陰茲因慶會謁余表君墓感君無忝為先生之後遂繼而書之諡于錦之人士云

學生鄭公鎮河墓表

松江鄭文清公諱澈以清名直道相我昭敬大王為國朝四百年名臣君其五世孫也靈芝有根醴泉有源則君之賢且美可知也君諱鎮河字重汝烏川人松江公之世不須譜而松江公第三子曰進士諱振溟進士生參奉贈執義諱漢執義生贈參

議諱光演至諱澱有文行自號谷口初娶長興任氏其考時尹繼娶完山李女君任氏出聰悟好讀書文辭華贍筆翰迢妙屢遊公車厄於有司日與經生學子講討濂洛諸書事父母生而致其養沒而盡其哀承奉繼妣人不知爲異顏也谷口公始在昌平舊居間以家事托君入漢師傲寓駱山下君每來覲或經歲經月而歸京鄉雖絕遠就養之方靡所不逮其誠勤之切尤人所難能也丙子冬君又來覲谷口公見盛具僕馬而至莞爾曰何爲此大舉死生之理冥漠何以明知君飲泣曰親意終不肯歸鄉則子當仍

留侍明年丁丑二月谷口公終沒於僑舍蓋君平日愛懼之誠豈但以推命之自恃也其警動於中者儻亦有黔婁汗流之異而然耶君客地巨創哭泣哀慼見者莫不感動親戚知友皆竭力相助斂殯能如禮將葬從族父之地甚哀族父感其孝與之葬任孺人葬形家言不中法竭心緬遷平居晨興拜廟祭祀輒齋沐盡誠蓋惇行孝悌人也尤菴先生嘗銘松江公碑書其孝甚悉君可謂克趾先美者歟三洲金公艮齋李公皆君所從遊每稱君有故家遺風竹泉金公趾齋閔公常曰松江公之孫有此賢士而老於蓬蓽

吾輩責也金公居選部白于 上將官君金公尋遞
不能焉君生于 顯宗丁未没于 肅廟庚寅墓在
同福茶貢鄉負子原從先妣兆也配竹山安氏安公
汝器宰昌平也方擇婿賢君才行歸其女云安氏性
仁淑甚有婦道年六十五壬子没附于君之墓左三
子參奉櫓出爲從祖弟一河後尸松江公祀橈早坳
棹一女婿柳震泰櫓五子寅煥今同福縣監述煥明
煥章煥克煥女長適李克生次適宋明輝次幼橈無
育取棹子碩煥爲後棹二子德煥碩煥女長適李容
海次適李敬重柳婿五子道翼道成道儉道約道貫

余慕松江公高風清節多從其後孫遊今棹來謁君
表阡之文嗚呼以君淵源之懿才質之美困踰以没
世豈非命也耶然後昆旣蕃衍且多佳士收不食之
報追賢祖之烈者抑將在是歟謹書其石以俟之云

處士河君

聖龜

墓表 辛巳

有聞道於九菴宋先生講學於農巖金文簡公爲一
鄉之善士曰故處士河君諱聖龜字休徵是也君資
稟粹明聰悟絕人讀書過目輒誦嘗從公車作舉子
業弱冠屢占解額親歿慨然歎曰我先祖錦沙公亂
後絕意仕宦有訓辭爲子孫戒當謹守詩禮以軼命

厚澤集卷之五十六
吾敢違之遂往謁于允菴又從農巖聞性理之說始知有用心處杜門謝事終日危坐博極羣書而允用力於大學中庸每勸子弟讀小學曰此是做人樣子一書足以盡天下萬善何用他求允菴手書爲學次第以勉之君十四居母氏喪戚易備至事其考極誠敬及喪哭踊踰禮幾滅性又能善事繼母推其餘與諸弟友宗黨睦家衆得其歡心教子雖慈亦勤策勵君之於百行可謂備矣君之世始於高麗司直珍以晉陽爲望逮我朝有諱潔官大司諫卽文孝公演之弟孫郡守治曾孫進士自澹皆以孝聞參軍諱大

豹典籍諱潤九諱魏寶諱禹績寔君之四代參軍公又有篤行早失怙恃追喪三年壬辰之變浮海勤王于龍灣上中興策典籍公自號錦沙光海世痛人倫敦絕作詩以見志丙子虜亂起義旅至清州聞媾成痛哭而歸棲身山水間不復出妣全州李氏文馨之女君以孝廟甲午生卒於肅廟丙戌得年五十三葬同福縣西永新里負癸之原君配咸陽朴氏別檢厚信之女己卯名賢收心齋薰之後也性嚴有法度舅姑嘗稱其閨範焉後君一年而生又後君四年而卒與君同窆三男一清五清永清皆以孝行克

世其家五清出為君弟慶龜後一女張宇衡一清取五清子廷益為後主君祀二女李壽禎廉致白五清二子長即廷益次廷嵩永清一子廷喆張婿繼子湫也自郡守公至君之諸子七八代以孝以忠俱名於世真所謂忠孝傳家者也豈不懿哉余癯老且病陞伏窮山廷益徒步六百里來以永清意請余表君墓余按其狀知君有師友淵源古語曰不見其山願見其木余於君信矣不辭而略敘之如此云

龔巖金公宅三墓表

歐陽公嘗表周堯卿墓曰今世之人知事其親者多

矣或居喪而不哀者有之生能事而死能哀或不知喪禮者有之如周君者事生盡孝居喪盡哀能以禮焉吾於周君有所取也蓋敦行孝悌人也今觀龔巖金公諱宅三字季用狀其純誠篤行若使歐陽公見之其必為周堯卿者二矣嗚呼熒哉公在髫鬣已能知愛其親周旋應唯儼若成人父病不解帶嘗糞調藥積數年如一日及喪毀甚葬則朝夕哭墓寒暑風雨三年不廢食粥不食食公年纔弱冠人憂其滅性既吉咸謂神明所相云事其母志體之養兩盡其誠喪而葬執禮尤篤築室於墓哀展視前朔望來將殷

奠不問家室卽返墓廬蓋遵朱子寒泉之儀也母病時思喫菰違節不得進及產薦之墓半日號痛欲絕終身不食以先墓不中葬法竭力營占晚年溝墳遷于淳昌遂以家焉晨夕瞻省到老非病未嘗或闕廣置祭田手栽百果以備薦享之資人有菑畚於近地者以價易而廢之爲文遺子孫申戒以守塚之方值父母喪日竟月不肉澡浴齋潔躬執饌晝則布席於廟門外終日竚坐夜則寢於門傍小屋以致如在之誠公舊家扶安伯氏奉家廟仍居焉時節祭祀之禮公自墓舍往來家中有大嶺險阨難行人鳩財募力

鑿而夷之以便公行誠孝之感人如此事伯仲二兄每朝冠帶卽兄所問起居和敬備至異室而無私財仲嫂沒於癘公躬自斂飾竟不畏避亦無所染人以庾袞事方之以父病十三始就傅天姿純美纔學優有志爲己之業沈灌經傳不得不措大學則支分節解發其微奧拈抄朱書節要最喫緊處作一冊蚤夜觀省又書九容九思張思叔座右銘諸書揭壁以自警與人論四端七情語皆精約多所發明常語學者曰小學乃做人樣子能通是書作聖根基在此也又曰熟讀一書句研而賸得其義趣然後可觀他書若

屏溪集卷之五十一
事涉獵則與玩物喪志何異以是來學者衆各因其材而篤之俾有成就尤菴先生聞公博學送朱子大全劄疑托共訂商而書有就正之語公之所居巖名磨礪先生及文谷金公書三大字還之書簽題以礪巖人遂以此號之李公翮其弟判書翊老峯閔公李公慶徽李公尚真宋公光淵或少小同業或晚年托契皆期與甚重閔公著重觀察嶺南印送儀禮經傳朱子語類請正其訛誤驪陽閔公按本道薦授健元陵參奉申公翼相繼以孝行純篤才學卓爾請除六品職陞典設司別檢尚衣院主簿皆不就年八

十五癸未卒于墓舍遺戒薄斂子弟請治命惟以松楸爲托葬于考妣墓下負坎之次葬之日遠近士子來哭者甚哀扶寧之金以高麗尚書右僕射作新爲鼻祖孫寶文閣太學士文貞公坵曾孫刑部尚書汝孟有文章功業鄉人並俎豆於社自此世有簪紳將仕郎錫忠僉正福公之高曾二祖也祖應鼈享年九十四以壽職資憲同樞考較以學行薦爲齋郎有文集公托文谷校勘又以狀請紀其事會文谷邁禍集與狀俱逸妣江華黃氏其考監察大衍公娶 贈參判金友說女爲配系出光山雖皆氏金所以得姓則

屏海集卷之五十六
異焉後公四月而沒與公同窆一男坊先公天六女
婿李濬李時龜洪信元朴再昌梁可松宋相益側室
四男一女坊無子子從祖兄之子自強內外孫曾若
干嗚呼子夏曰事父母能竭其力雖曰未學吾必謂
之學矣今公以根性之孝濟學問之工行成于家教
施于鄉是則豈但爲歐陽公之周堯卿而已哉然而
翬然自樂屢徵不起亦所謂隱居求志者非耶此又
可以表其墓矣來謁文者側室子載第二子自明也

參奉李公

先稷

墓表

曩賊臣輝棧輩誣讟我寒水權先生斯文陽九時則

有若李公先稷退夫倡同門諸子瀝血仰籲格不果
上余與公周旋公車間相視慷慨雪涕而歸至今五
十年歷歷如昨日事而公之墓木居然拱矣公孫思
默請書公圭首之石義何敢辭公未成童丁父憂哀
慕視禮母勸就外傳公泣曰不忍遠遊几也母曰參
師勤學承先志孝也公始從李聾溪秀彥學聾溪公
之從父兄弟子也嘗曰此叔他日當成大器弱冠往
師尤菴宋先生先生賞之曰某質純見明可期遠大
己已禍後復以事尤菴者事寒水先生凡有斯文事
先生必曰退夫待而諮決 萬東廟寶二師之志而

屏溪集 卷之五十六
管董成就公乃始終焉公少魯爲學用捧摑工於書無不讀讀輒沈灌融會晚年家計又在程朱書其造詣之成可知鶴鳴聲聞其理即然歸樂堂季公晚成按廉薦公行授 章陵參奉公乍拜旋歸蓋權先生被誅時也居數歲有 章寢命暫就辭如初其後又除 寧陵銓家注擬公歸語人曰今日官李某人皆謂余爲明有司云公則竟不起戊申賊屠清州公挈家入山中背負祠版而行曰一息未滅豈可離先廟乎遂與蔡公之洪卞君熙夏倡議指揮義旅入上黨城勦滅餘賊亂已入丹陽小白山金谷村愛其清

勝爲終焉計越數月以柩歸士友相與弔曰賢士已矣操文來哭者衆且哀公早失嚴顏孝事慈闈愛敬俱篤季弟不勝喪夭以其子子之俾不絕世長姊寡而無依養于家立其後教子弟以義御家衆以恩敦宗戚恤困窮祭先稱家有無一於誠晨謁于廟出入必告蓋公平生最好小學家禮以是爲力行之基故其行誼敦篤與世儒口耳剽竊華而不實者絕不同焉余每見公志氣閒穆舉止溫靜即其外可知有涵養之力今狀中所稱多在行一邊亦可謂知公也已公韓山人自稼牧麟三先生在搢紳間蔚然爲名門

厚淵公之四世而母曰密陽朴氏將仕郎承瀚其考也初娶縣監連山徐楹女不育繼娶坡平尹瑾女舉三男秀晟秀迪是出後季氏者秀沆一女適朴良遂秀迪二男二女長即思默爲秀晟後尸公祀思文成任天金聖雨兩婿也秀沆四女長仲適鄭漢輔韓海濟餘未行公没在己酉五月二十一日距其生辛丑得年六十九葬于清州機巖先壟向卯原元配耐瑪

孺人蔡氏表石陰記

孝烈一理也一身并有絕罕死節至貴也從容就死

又絕難若孺人蔡氏其庶幾夫生五六歲已知事親之方十歲母喪哭泣使觀者悅蓋其孝自幼而然及歸南氏事舅姑敬待夫子順奉祭接賓皆中法度爲閨門範夫在山寺發痘證甚惡孺人不克躬秤水扶護晝夜沐浴露禱竟訃至號擗不欲生自縊者三而賴傍人救雖不殊人不忍見之其舅泣曰老父所依恃汝夫與汝汝夫先棄我汝又不念我決自裁我亦隨汝死而已孺人曰小婦穹壤間罪人元無一刻假息義尊舅命惻怛至此且念夫子生世二十年有室無子婦死更無人喪三年得無爲地下冤鬼婦當

屏溪集卷之五十六
終三年自盡願尊舅勿復慮仍書小紙納之棺中乃
三年訖下從之語也未幾孺人又患疫顆粒輒括去
曰汝我讎也忍令留吾身速死我使我從夫子顆初
甚密終極順利人異之不舉頭見人不露齒對人髮
不梳衣不澣不啜粥粒三年如一日家人或強之飲
孺人曰讎日再至吾將已矣勿苦勸我形骸毀甚至
不能起則必索衰服加身以戊申三月十六日竟殞
絕其所言讎日猶不及三朔時清州賊報急至人皆
奔避族人咸曰此烈婦也其死爲夫宜厝其夫墓側
不得然而先自避去神必殛吾輩不免於賊并瘞畢

而去噫孺人既不弛自矢之心又無違尊舅之命秋
霜烈日之中亦有藹然陽和之意其貞烈之操孝順
之性真不可以一節論且一心三載持之不貳而言
語舉止一循常度無一毫乖激晏然如終天年者然
其從容就死又豈與一時辦命同日語哉恨不遇劉
宗正而闡揚於彤史也孺人籍仁川大司憲壽八代
孫夫子名尚翼其父廷麟南氏世居黃澗之壽山處
士三槐堂知言之後時 崇禎甲申後百單一年甲
子夏坡平尹鳳九記

大司憲松齋羅公

世續

墓表陰記

厚溪集卷之五十六
有明嘉靖三十年我 明宗大王之六年辛亥松齋
羅先生卒九菴宋先生大書其墓曰大司憲羅公諱
世纘之墓寒水權先生狀其行後學坡平尹鳳九撮
其狀題其石陰曰嗚呼公字丕承 中 仁 明三
朝之際羣賢蔚興文學之士謇諤之臣濟濟盈庭公
卽其一以文學進稱謇諤節公可謂兩有之也公生
而穎悟早有志於爲己學淹貫經史詞藻燁然 嘉
靖乙酉中司馬試戊子登文科丙申戊戌荐魁重試
及擢英試且於泮製 庭試俱以優異之等輒居一
頭文譽日盛初隸國子薦入翰苑由郎署歷兩司春

坊而玉堂則自修撰至典翰轉藝文應教檢詳舍人
又與退溪河西兩先生 賜暇湖堂皆文苑極選也
甲辰陞吏曹參議周流承旨大司諫大司成判決事
乙巳超嘉善連 除大司憲左右尹忠清監司終沒
於全州任所壽五十四先是安老用事戕殺忠賢恣
行貪虐人莫敢言公因重試對策論當今之弊曰指
鹿之姦豈獨在二世之朝廷乎蓋指斥安老也安老
大恚誣公傾陷朝廷酷施拷掠骨髓迸碎公拾碎骨
納囊子曰父母遺體也不可棄遂裂衣以血書數行
疏曰爲國丹忱白日照臨及進御 中廟惻然持宥

屏溪集卷之五十一
公棘于固城公座隅書忠信二字手中不釋心近諸
書自發於歌詞有時吟罷北望揮涕 上使人覘知
之始感悟丁酉安老敗死以前任奉教 召還引對
優殿 賜御醞示悔意乙巳 兩聖繼陟 嗣王幼
冲 母后垂簾 后弟元衡與朋芑等造危言嫁士
禍公入對 簾前救解善類又疏辨白仁傑諸諫官
縲纆之非遂遞諫議後以大司憲復申前言終見罷
芑等以公會入侍忠順堂欲與晦齋李先生并錄勳
籍公則力避不從芑等惡異已擠不容朝端戊申姦
凶輩以 仁廟君臨未踰年謂不可入 文昭公陳

疏極言其不然斥補全州府尹政尚寬仁務興儒教
吏畏民懷一境洽然羅氏貫錦城三韓壁上三重天
匡府院君諱聰禮寔初祖世襲簪裾至祖諱殷制以
學行 除縣監錄清白 贈承旨考諱彬生員 贈
參判當己卯屢抗疏救靜菴諸賢卒同被禍兩世皆
士類所推公文學之高謇諤之操固自有淵源也妣
贈貞夫人海平尹氏察訪勞謙女公娶潭陽田氏受
貞夫人真誥其父世均公世居錦之居平終葬所居
東松林山卯坐之兆夫人耐焉南土建祠其鄉俎豆
之男長惕縣監仲協 贈參議季悅女適金景德金

千秋府使柳夢井察訪李黃鍾 贈參議柳濂德允
德敏魯尚文察訪李洪鍾妻長房出 贈參判德全
仲房出縣監德元進士德立參奉德種德符郡守金
忠秀柳守敬妻季房出今至六七代內外曾玄多不
盡錄公孝於事親惇宗族信鄉里德成氣和一覲心
醉爲文章根據經傳務去浮華雖尋常應舉文字門
內書札必主義理真淳如菽粟至其立朝事君忠與
信參倚前衡爲一生用是以刀鉅鼎鑊若無覩也惟
道是循再當蔑貞之時剛大正直之氣無少挫損丙
申桁楊之酷聞者氣短而主知亦結於此矣 中廟

嘗眷眷焉語 文定王后曰此人可以當國大事至
乙巳禍作爲元芑所惡竟不能害者以 文定猶不
忘 先王遺意也當日君臣之契亦可見也後德全
妻辭氏夫病夜輒露立禱天慮其意怠穿掌貫索晝
則解索救病及夫死斃性卽滅其子進士逢緒父病
割指灌血 朝廷俱命旌褒公忠孝家法如此云時
崇禎甲申後再丙子仲秋日謹記

俞公

命集

墓望柱石銘

唉昔屠維黃裳倒置公咄慨恨不肯赴試及後黃猴
亂賊稱兵先屠帥營將犯 王京公奮灑涕倡義誓

衆雖聞馘進斂我邁勇 君有賊誣公猶心痛約同
士友上章共討人多怯怯終歸寢沮胷中鬱律如鉤
未吐若公忠義寔全天昇蓋資孝悌素嗜惟此孝心
闡揚靡所容極謁余數句要鐫柱石姓諱生卒已載
表刻今不架壘只銘大略 崇禎甲申後再丙子坡
平後人尹鳳九識

屏溪先生集卷之五十六

